

鄧尉山聖恩禪寺志序



於華藏世界中紀九州四海賦
三都兩京過量人猶軒渠以爲
是算稊米太倉數一毛全馬也
矧夫郡一邑邑一山山一寺如

聖恩之在鄧尉顧欲取其人物
語言盛衰廣狹更僕而指數之
以成一袞壽之棗梨是不可以
已乎有說焉是寺故善知識龍
象蹴蹋之區也腳尖所踢拄杖

所挑時有無量諸佛菩薩於一
毫端放光明動地唐宋以前雖
未大著數百年來塵垢糝糠豈
止一二人堯舜哉以言乎至小
莫頂踵若進而之芥子之藕絲

眇乎眇矣然而納萬卷書於頂
踵納須彌於芥子納八萬四千
修羅於藕絲孔中一一坦舒無
壞無雜則其間高廣奧折雖使
離婁運睛普眼播舌隸算頡書

如此百千萬營營窮劫亦不能
盡志之於山於寺祇不足是患
患有餘乎哉安期周君以剖師
命任此役蹉跎未及就余故受
三峰老人付囑願觀厥成敦趣

之乃竟業會 國難相尋彼此

無暇晷略加裁定即授梓人如

譜奕然此王積薪所受嘗執耳

後有作者於是十九道中一道

或一道中一着監百千妙義使

觀者讀者窮未來莫能彈究庶

幾漚漚乎大觀矣

大明崇禎甲申歲仲秋日楚人熊

開元敬識



鄧尉聖恩寺志敘



聖恩堂頭剖石和尚初繼師席方
振宗風宜其不以文字爲意顧卽
購得山志舊本并條示法源及中
興事實持以授余俾作寺志余承
命以來略已草創顧以懶性而兼

雜學遂至緩於討論修飾之事因循直逾六載和尚旣屢書相促嘉魚熊先生復寄遠信欲急觀厥成乃復尋繹舊聞搜採別書稿凡再易釐爲十八卷稍具權輿以待能文者之潤色蓋茲山於花事爲香國季廸輩所不能盡詠於佛教爲禪窟子威輩所樂與首載以視虎丘之有隆祖洞庭之有顯懷父子皆用名山之傑出者以高豎法幢又不與他叢林比惟以晦於前代顯於

國初故不獲入唐宋人紀述要以鼻
觀心宗咸據絕勝則亦何嫌於後
出若夫爲袁爲玄之有別爲尉爲
蔚之各殊與夫玄墓鄧尉之爲離
爲合開闢來已具奧曠之觀傳聞
間奚爭同異之數撫卷而如按圖

與寓目者之能會意耳况禪學中
興祖庭再闢曹溪南嶽近在湖山
或亦能令觀者一新眼界且至并
忘作者之孤陋寡聞矣舊志重在
山故止標名勝今志重在寺故悉
備故實斯則和尚見委之微指余

所緣以屬筆者也

崇禎壬午仲冬既望周山樵者周

永年書



鄧尉山舊志序

陸 粲

鄧尉吳之名山也前此未有志沈君潤卿始爲之
讀者謂其詳贍得體非苟作也余少時嘗一游茲
山今二十年矣間者再至雖巖壑之勝不殊而梵
宇荒落頓異疇昔其間幽棲邃構往往爲勢家所
據而長松古梅剪伐殆盡問之山僧云苦更賦繁
重鬻以償逋負矣余聞而憮然比得君志讀之則
往時秀傑深迥之觀猶歷歷在目爲太息不能已

抑盛衰相尋固物理之嘗未足深論余獨慨夫橫
政亟行而人力之日單竭也雖浮屠氏自謂修出
世法者猶不能一日安其居以保其所有矧夫齊
民者耶君子卽是編以考其廢興之故可以占時
政焉不徒觀游之細而已而君所謂區區纂輯意
亦有在於斯乎故書其後以俟夫觀民風者錄焉
嘉靖丙申端陽日長洲陸粲浚明父書於貞山草
堂

舊志總敘

沈潤卿

吳號澤國而其西境多山自秦餘杭以南迤邐至
於太湖其間標名紀奇者亦衆矣厥有鄧尉山寔
臨湖上龍翔鳳翥特立雲表奇麗卓詭稱東南之
秀焉信人寰之異區霞外之絕境矣山舊名火尖
東漢鄧尉隱於山中始有是名後晉青州刺史郁
秦玄葬此故又名玄墓云前世猶未大顯洎勝國
之末萬峰蔚禪師卓錫其地始創精藍亦名萬峰

厥後緇流相承益勤締構遂成鉅刹其中有清泉
碧石修竹茂林堂宇皆靜密幽雅談者稱爲吳中
諸山之冠特未有志之者予雖家郡城而先墓所
在歲必一再至必徘徊依戀不能舍而去也因爲
考其事而列焉

鄧尉聖恩寺志

圖 凡三各系說


鄧尉山寺形勝圖

鄧尉登山入寺津路圖

聖恩禪寺殿堂樓閣全圖

寺形勝圖

魏家河



青雲山

五三茶院塔

院塔

道宗塔

大義堂

萬工池

僧田


西灣村

竺山廟

丁竺山

珠珍嶺

嶺長



鄧尉山寺形勝圖說

鄧尉東自穹窿諸山來結脉最長南北西三面遶湖而聖恩寺坐坎向離居明堂正位具區三萬六千頃當襟攝受漁洋山爲正案莫釐縹緲則遠炤矣七十二峰浮黛出沒亦足點綴勝槩左抱米堆逶迤東南度呂浦石梁仍轉漁洋又爲正拱穹窿鳳凰諸巘聳列外護右抱青芝長旂綿亘西南竺山廻顧湖中而外護則珍珠潭西磧諸高峰也此三龍三鳳人天朝拱之區非大覺金僊不能享非國師禪祖不能居萬峰開闢於密中興大法聿隆天行數值邇遐覩法幢而稽首緇素叩祖塔以合尖欣剖公締構之完正


新皇登極之會山靈尙希

詔旨紺宇再勒穹碑則聖恩福利寧止誇揚震旦哉

○舟航東繇胥口過呂浦橋則山南錢家壩施家浜躡屩而登或從東北浮履橋轉南則姚家河涉柴莊嶺循徑入寺亦爲坦道

王煥如識



登岸津路圖



鄧尉登山入寺津路圖說

此鄧尉之西面也寺故南向前圖已攬勝矣茲曷
爲又圖蓋山之勢自光福而起人烟輳合舟輿登
涉徑深路修而寺乃幽邃山川映帶古刹依巒與
震澤之層波相蕩漾尤有情致矧光福枕山之陰
爲寺後坎虎山長虹肖龍卧而講寺浮圖則又聖
恩翔鳳之尾也其偃仰上下竝合彤家之說故萬
峰手構獨推佛土之尊代有禪師繼隆燈燄其意
義不可弗顯噫嘻東西三崦匯玄武之廣瀦包費
兩河便青舸之繫纜自奉慈以攀石址緣崖蹭蹬
可循轉銅井以達市墟到處桑麻無間得閒亭畔
高人寄碩隱之踪司徒廟前全里護棲神之柏種
種皆助精藍之景人人求添點綴之工鉅姓夜臺
聆鐘聲而返魄漁翁布艇聞魚唄以收帆普利羣
生望峰頭指見明月皈心諸佛度嶮下徑躋禪關
展閱斯圖不僅謂春花秋月夏蔭冬薪誇東南之
絕勝已也

王煥如識



粟不習繪事竊知攷山川
 地理遠近夷險嘗作東南
 水利江南撫治諸圖進
 當寧吳邑方輿湖山鐫入
 新志蓋有利民生義不敢
 辭茲辱 剖大師教畫鄧
 尉山寺圖尤紹隆 佛法
 實切皈依若云筆法疎拙
 則非粟所知也崇禎甲申
 李夏長州徐謙謹識

旌邑鮑良刻

聖恩禪寺殿堂樓閣全圖說

聖恩寺殿堂樓閣位置皆勑自萬峰禪祖而繼爲增拓則虛碧諸師先後手蹟在焉茲協陰陽之宜體天人之道動

當宁傾慕啓四衆瞻依凡山之陽皆萬峰淨土厥後法裔陵夷析房爲十四值困役累糧逋或轉屬巨室爲山房別業擊魚誦唄之所多爲酣歌豔舞之場幸神鬼訶譏檀那遮護漢師重振法席剖公嗣響宗門羨道之彌高皈心者益盛僧居悉併嘗住棄

壤漸復伽藍施米施錢襁屬而集運材運甃航載而來朽腐易以堅新欹邪支以正直金容玉相現慈藹於

世尊複道重檐侈嗟峨於氣象

宸翰爲山門永鎮凜森立之巖巖單詞爲頑漢指迷驚壁懸之塵棒百遍大悲神呪晝吼鼉音千聲極樂彌陀夜聽版寂按堪輿更舊制與東西南北之諸寮循故蹟顯芳模窮南北東西之四址剔仆碑于草覆培祖塏干榛栖擔水負薪種種助道之力開

荒鑿沼事事服民之勤拾級甫登但見翠筠蔽日
馮欄四顧轉仰喬木叅天豈徒地靈昔年何以幾
廢全繇人傑今日所以中興謬託東吳識小之遺
敢揚

西聖刹塵之化

崇禎十七年甲申七月朔婁江王煥如謹識

鄧尉聖恩寺志凡例

一山占地勝寺占山勝非繪圖幅不能總攬形
勢故鐫圖置之卷首

一舊志有本志今因之但欲刊定山名不嫌旁
考故特遍加叅詳為卷之一

一舊志有泉石今亦因之此今昔無改也為卷

之二

一舊志有梵宇有山居今總為梵宇而以山寺

一 山菴山居並列以其皆屬淨地也爲卷之三
一 舊志有名釋今欲推重燈傳故分禪祖爲卷
一 之四名釋爲卷之五
一 舊志止於集詩集文故以一賜詩 敕諭冠
一 兩者之首今詩文裒聚旣多臚分各異故特
尊 聖製不與他作同卷爲卷之六

一 昔併菴爲寺寺以初創今改書院爲禪院寺
以中興又寺額 賜出 天朝稽諸案牘皆

有考據故以奏疏公移爲卷之七

一 有寺則有記記所以永寺也故以寺記爲卷
之八

一 有禪祖則有語錄錄所以行禪也故以語錄
爲卷之九

一 有錄則有序序所以弁錄也故以錄序爲卷
之十

一 寺之興與寺之復僧之聚無不取資檀施故

以募疏爲卷之十一

一禪語所繇成錄本於勸請說法故以請疏爲

卷之十二

一舊志有祠墓介于泉石梵宇之間今志歸重禪寺故以塔廟爲卷之十三而祠墓附載不盡則有郡邑兩志在也

一有塔則有銘銘所以表塔也故以塔銘爲卷之十四

一鐘爲寺鎮法華鐘更爲法寶其因緣功德甚大非他器可比故特列鐘部爲卷之十五

一名山名刹時有名人來游而不盡作記記所以表山刹也故以遊記爲卷之十六

一名人之作記少詩多詩所繇作亦多種總不離山刹故以題詠爲卷之十七

一名文有爲此山作而非前諸條所得類收者當別載以附見故以雜文爲卷之十八其詩

縈帶其前法華山浮於波面烟雲明滅頃刻變幻日落
則頰玉萬頃月明則素練千尺飛帆往來鳧鷖起落凭
高遠眺心目開朗若夫曉氣凝合霧靄橫斜重巒飛動
樓臺隱約時有天風引吹白雲彌岩塞谷擁護松檜若
琪花翠黛掩映白雪別具一種妙象山雨欲來暝雲合
沓泉飛樹杪溜滴檐端旣而郊原流潤山澤含輝新水
平塋可坐而濯陰晴夙莫間倏忽異狀此則山之大觀
也乃至曲徑深蹊艸樹茂密幽庭古砌花竹秀雅觸處
成景未易殫述郡人固好游大抵先其近者而此以遐
邃故罕及焉然名流逸士探奇選勝者亦累累無虛日
云

大明一統志

玄墓山在府城西南七十里一名鄧尉山山峰四立林
木葱蒨前一石竝立太湖中若畫屏然山上有萬峰
寺樓閣翬蜚湖光掩映亦吳中佳處其山之陰名至
理山山勢蜿蜒前瞰太湖對峙陽山光福諸山左右
夾拱山雖北向隆冬入山其氣盎然

盧熊蘇州府志

吳縣山

鄧尉山在縣西七十四里

玄墓山在縣西南七十里即晉青州刺史郁泰玄墓

聖王鏊姑蘇誌

鄧尉山在光福里俗名光福山在錦峰西南與玄墓銅

坑諸山聯屬

按聖恩菴開山記作鄧尉山菴在玄墓山之南岡記作袁墓村蓋舊志以袁為

玄蔚為尉而各村以山耳後得宋進士葉和甫墓志與舊志相合

其東有虎山鳳鳴

岡至理山北有龜峰光福寺在焉其相連諸山有安

山聚塢山朝士塢蟠螭山西磧山

在游湖南彈山即小雞

山在湖濱土阜也

竺澤叢書小雞出胥門西行四十里過光福市市西五里土多石寡

無大林木

竺山

一名竹山

觀山茶山

即繡裘山也

吾家山茆岡山石

帆山褚山邢山游城山

在游湖北

長山皆附鄧尉山

玄墓山相傳郁泰玄葬此故名在鄧尉西南一名萬峰

山山之半南面太湖遠見法華山如屏浮於波面東

有米岡山與石牌至理諸山相連直抵呂山其西則

孫家蟲頭諸山迤邐入於湖心其南為周山

聖恩菴

在鄧尉山之南岡元至正間僧蔚萬峰自杭來止於此初蔚辭其師千岩請所往答曰汝

名所止也至鄧尉結菴居之其徒大集遂剗精藍為時名利洪武中僧普壽普隱永樂中僧智璿先後重

建內有碧炤軒

楊循吉吳邑志

光福山盧志云在縣西南七十里姑蘇志云鄧尉山俗名光福山與玄墓銅坑諸山聯屬也

餘山十

安山 在西一里 虎山 北二里 銅井山 蜀山 聚塲山

小雞山 長山 新豐山 錦峰山 西磧山

玄墓山盧志云在縣西南七十里舊云晉青州刺史郁泰玄葬此故名姑蘇志云玄墓山南面太湖今按此山有土有石宜松竹楊梅柑橘而梅特盛高大之山

也 寺 萬壽聖恩禪寺 元釋時蔚建

餘山十四

柵山 東 石帆山 呂山 西 竺山 法華山

觀山 吾家山 茶山 茆山 褚山

刑山 雅宜山 周山 漁洋山 並在南

王煥如吳縣志

鄧尉山在光福里錦峰山西南去城七十里漢有鄧尉者隱此故名或作蔚非也北有龜山光福塔在焉前為鉢孟山山之西北為虎山中通一溪跨以虹梁曰

虎山橋橋之西南有上崦袁中郎宏道記云兩峽一溪青巒四匝山前長隄一帶幾與湖埒隄上桃柳相間每三月時紅綠燦爛如萬丈錦其東麓三里有七寶泉鄧尉西行歷烏山觀山朝士塢外窰裏窰熨斗柄西磧山彈山過長旂嶺竺山至玄墓出入湖山間山人以圃爲業尤多樹梅花時一望如雪行數十里香風不絕此吳中絕景也所歷諸山大抵各有致惟西磧最高大少景然在湖濱潭西聚塢差勝潭西一隅色如鐵名鐵山

玄墓山在鄧尉西南六里相連不斷本一山也後晉青州刺史郁泰玄葬此故名國初萬峰和尚居之又名萬峰袁學憲袞遊記云吳之山惟玄墓最僻亦最奇面湖而險隩丹崖翠閣望之如屏背鄧尉而來法華障其前銅井青芝迤邐其右游龍界其左尤奇在絕頂一登則洞庭諸山悉陷伏於湖而湖波遂混茫蕩爲一色山之麓有奇石在盧橘樹下勢欲飛動山有聖恩寺卽萬峰道場舊法堂在佛殿東北其前銀杏數株皆數百年物歸太僕有光詩曰欲尋老子當

年處五杏叅天寶殿東正指此也其後則奇石在焉俗謂之真假山石類太湖天然嵌空以此知湖石玲瓏者不盡出水力也但此石頑大非湖石比殿右爲郡士徐冽山房今爲漢和尚靜室庭中古桂數株本當時屏障今皆七八圍矣繆結甚奇山前面湖法華山浮於波面東有錢家坎米堆山顧封公天敘闢有五雲洞其山與柴莊嶺石牌諸山相連直抵呂山西則孫家嶺蟲頭諸山漸入於湖南爲周山山前之水又天壽聖恩禪寺在鄧尉山之右唐天寶間建天壽禪

寺宋寶祐間又建聖恩禪菴元季寺燬菴存萬峰禪師時蔚開山說法本朝洪武九年闢建觀音閣徒普壽構法堂又徒普隱等建大殿齋厨三塔院又徒普持鑄巨鐘建層樓永樂七年智璿重修大殿建藏經閣天王殿方丈山門寮庫碧炤軒正統八年僧道立奏請賜今額嘉靖間鐘爲分宜移去萬曆間僧素一修寺如曉募銅鑄鐘如舊雲棲僧智在謀建鐘樓郡士徐冽捨山房復虛碧塔院崇禎元年吳江知縣熊開元延三峰法藏主席建大法堂僧炤覺又修

萬峰塔院建文殊堂崇禎三年金粟圓悟又移堂院
左今兩院並峙六年法藏修大殿佛閣建方丈并規
畫重建天王殿山門屬徒弘壁成之壁又建大悲堂
及造毘盧像造大藏經供佛閣

順治十年經閣成復遷大藏供于閣上

陸應陽廣輿記

玄墓山

府城西吳之山惟玄墓最僻亦最奇面湖而險丹崖翠閣望之如畫相傳郁泰玄葬此故名一

名萬

峰山

鄧尉山

玄墓之北俗名光福山

按玄墓鄧尉郡邑志皆分為兩山而山志則合為一

山今俗亦通稱玄墓間呼鄧尉要不能不以一山兩名如一統志所載為準矣

山之左岡曰米堆山突然高聳如米瀉之狀其南為呂山舊有胡堅嘗墓廬因名胡菴山後以呂姓蕃衍遂易今稱

米堆後有柴莊嶺石牌山山後為東西山姚二塲姚蓋亦山中著姓也又有塲名章墳其北有學士塲及南北山塲二塲

志里村光福里有虎山相傳吳王闔閭養虎於此下有

崦中界石梁名虎山橋因稱東西二崦又名上下二崦四周皆山圍合映帶最為奇勝人謂吳中山水佳處無踰此者

山西嶺曰竺山環繞抵於湖其後為長旂嶺聚塢北折為山之西麓有幙山市墟前後雀梅蓬石址西橋市堰諸村

山南居民數家為袁墓村其西為陸家塢又有村名西灣竺山渚云

鄧尉聖恩寺志卷之一 終

鄧尉聖恩寺志卷之二

泉石

七寶泉在山東麓僧於岩下鑿池貯之結亭於前泉從其下流出伐竹為筧引之味殊甘冽其南有玉泉一泓清澈可鑑僧結廬其上山西麓有壽岩泉與七寶泉相背疑本一脉也

八德泉舊名沸珠在寺之西南近河平田內因水沸如珠故名後人砌甃方池覆以大石年遠仍廢迨崇禎戊寅大旱徧山水少惟此泉盈滿遠近人民競汲不竭日

供寺衆三百餘其味冲澹甘潔烹煮有異色鄉人縲絲俱用此水爲佳品

法乳泉在西山祇林後萬曆初忽從石罅流出土人壑池深二尺許嘗盈不涸味甘清冽

井有四一在喝石下名中井大旱不涸近者接竹引之

一在齋厨外一臨山半即巧山下一在僧室簷下

又井四一在山門西南茶園前一在上陽村大路南一

在聖恩下院齋厨前一在香光室左皆甘潔

山南鄧太尉廟東有一井名曰龍眼俗呼三角竺山廟

有井亦名龍眼其味俱與嘗水異

萬工池在聖恩下院東南大路傍放生池在純白窩前

鉅石在天開圖畫僧室後天順間忽於土中露見稜鏗

扣之琤琤遂加剔濯巉巖洞越巧若天成舊刻獅子岫

棲禪洞螺髻峰滌硯泉凌空橋削壁岩流雲澗海湧門

八題於上今廢

山之絕磴東上又有巧石俗呼真假山青碧奇絕前有

望湖亭今廢西下有喝石相傳萬峰師穿井有巨石上

墜師呵止之遂名

鄧尉聖恩寺志卷之二

終

鄧尉聖恩寺志卷之三
梵宇

山寺

山寺舊名聖恩菴宋寶祐間建天順間賜額為聖恩
禪寺初萬峰蔚禪師既創菴居復得葉和甫所葬碑
石欣然若有宿契遂盛作佛宇其後有普壽智璿道
清道宗以下相繼修建樓閣傑聳與林谷相輝映遂
為西山叢林甲乙焉中有大雄殿上設釋迦彌陀藥
師像繞以十八羅漢其天神二十則侍立焉左為鐘

樓殿之前爲天王殿立高皇帝賜無念御製詩
碑刻又前爲金剛殿其東立小山門以便出入殿之
後有毘盧寶閣中設毘盧遮那像環列十二圓覺楣
棟列無名佛萬計又名萬佛閣下奉觀音大士像傍
度經律論三藏書五千軸閣後爲禪堂中設憍陳如
像旁設廣榻則修其學者列焉其左有大悲殿後爲
法堂堂左屋以奉釋初祖達磨及中峰萬峰二師亦
有祖師堂右屋爲伽藍神趙松雪書扁其東爲齋堂
扁曰香積庖庫庖漏二十餘楹寺既有名額人慕萬

峰道行又稱萬峰寺云

以上係舊志文以下據見在記

大雄寶殿宋寶祐年間創始至明洪武二十年丁卯四
月開山始祖時蔚鼎建正統元年丙辰閏六月住持
智璿重修崇禎八年乙亥七月住持法藏又重修於
大清順治十四年丁酉七月十一日住持弘璧同耆
舊戒萃監寺濟如照聞等重新鼎建

毘盧閣亦名梵天閣在大殿後正統十年乙丑六月住
持道清鼎建崇禎七年甲戌十一月住持法藏重修

上層順治十三年冬住持弘璧又修下層

大法堂在佛閣後永樂十四年丙申十二月住持智璿

鼎建廢久基存於順治五年戊子正月初六日住持

弘璧同濟据濟如等重建

舊方丈在法堂後地益高山之最深處也其後有美石

嵌空玲瓏森狀離立前臨虛壑瞰太湖諸峰於欄檻

外洪武九年丙辰開山萬峰蔚祖創建太常卿程南

雲扁曰天開圖畫隆慶間杖朝頑健吳涵復扁東為

雙梧軒少師姚廣孝題西有碧照軒主事陳亢宗書

後有室曰萬峰深處即蔚祖寢堂並廢基存今樹

景英二廟

御碑永鎮於上

恢復事蹟別見

東關在佛閣左順治十五年戊戌冬建

伽藍堂在大殿左

祖師堂在大殿右順治戊戌三月重建

天王殿在大殿前景泰七年丙子五月住持道清鼎建

崇禎八年乙亥十二月二十六日住持法藏同門人

弘璧監寺濟教等重建洞庭優婆夷法名濟後捐貲

協建中奉彌勒像傍列四天王彌勒像後立

高皇帝 賜無念 御製詩碑南向懸

敕賜聖恩禪寺扁 昔 大明天順三年歲次己卯五月吉日題

金剛殿在天王殿前正統十一年丙寅三月住持道清

鼎建 今廢

三門在天王殿前順治五年戊子正月初六日建即金

剛殿基

香花橋在金剛殿左正統十四年己巳七月石城萬壽

寺住持宗學捐貲獨力建本寺釋道清題 石刻在橋南下

鐘樓在大殿東南洪武二十一年戊辰寶藏持禪師建

崇禎七年甲戌四月初九日住持法藏同堂主性貢

重建上懸法華鉅鐘下設舍那佛像 事蹟別見

大悲殿在佛閣西北隅即棲雲山居故址崇禎十年丁

丑八月初七日住持弘璧鼎建海虞譚于墀為求嗣

捐貲協建

南廊在大悲殿前長廊在大悲殿左一指軒在長廊中

間俱崇禎己卯年建

拈花堂在南詢堂前即虛碧璿禪師退居故址崇禎二

年己巳六月十六日住持法藏同監寺濟萃堂主性

貢等鼎建

事蹟記云璿禪師以僧臘之高謝事退隱同袍寶藏持禪師典其事又師塏銘云營築退居塏院二所俱備又云瘞於祖塏之左倚於本寺之右崇禎六年癸酉按察御史陳公乾陽置額題為萬峰禪院興復事蹟別見

方丈在拈花堂西北於密塏院前崇禎三年庚午四月

住持法藏建

華嚴壇在方丈後塏院左順治十年癸巳閏六月十二

日住持弘璧鼎建

東廂樓在壇之左順治十一年甲午三月二十五日建

西廂樓在壇之右四月二十日建

藏經閣在新法堂右順治十年癸巳十一月二十二日

鼎建

溫研寮乾室在方丈右肩崇禎壬申年建

證心室在方丈左肩崇禎四年辛未建藏禪師為諸子

入室處

舫齋又名船屋在證心室前崇禎壬申年建

侍寮在證心室左茶室在侍寮左

精進堂在拈花堂右肩崇禎三年庚午八月住持法藏

鼎建

大歇關在拈花堂西南精進堂前永樂十四年丙申建
卽虛碧璿禪師退居天啓五年乙丑藏禪師於此著
濟宗頌重修

叢桂齋在大歇關前崇禎十一年戊寅二月十七日住
持弘壁建

廂樓在叢桂齋右崇禎十五年壬午八月二十日建

南詢堂在大悲殿前順治七年庚寅十月十五日建

四宜堂在拈花堂前永樂十四年丙申建卽虛碧璿禪
師退居於大清順治十三年歲次乙未九月初三甲

申日子時重建

庫房米廩並在白衣閣後崇禎四年十月住持法藏建
經書樓在四宜堂西南叢桂齋前庚子十一月日建

小樓在庫房右崇禎十五年壬午十二月十八日建

白衣閣在拈花堂東南庫房前崇禎十四年辛巳二月
初二日住持弘壁同監寺濟觀等鼎建上奉白衣大
士像

還元閣在白衣閣前順治五年戊子三月建

禪悅堂在大殿左肩順治十五年戊戌二月初八日建

香積廚在大殿右肩戊戌十月初六日建

悟因堂澡室在大歇關右

茶房延壽堂印房在還元閣前順治庚寅年建

卽心堂新樓行寮淨所俱在叢桂齋西南一帶崇禎四

年辛未十一月建

純白窩在寺西崇禎六年癸酉七月二十日住持法藏

鼎建開荒鑿池置飯僧田三百六十餘畝有撫按府

縣免役碑建大義堂放生所諸堂室永爲聖恩下院

舊法堂在大殿東北隅洪武九年丙辰開山萬峰蔚祖

鼎建正德二年丁卯七月十一日練川普炤禪寺住

持明尊重建

南菜園在山門下大路南順治八年四月十一日建

茶園在山門西南萬工池右順治七年三月初三日建

西山靜室在田庄西北順治十三年五月十六日建

西菜園在寺西萬工池東南順治十五年十月二十日

建

碧雲庵在寺東柴庄嶺順治十五年十月聖恩常住恢

復重修

天壽寺在寺西真如塢順治七年歲次庚寅十一月十

五日丑時住山沙門弘璧鼎建

平十日

西茶園寺在寺西

山禪室或田五西北

正覺菴在陸家塢元元統二年甲戌僧大楫建廢久其

有東菴其北有石址菴即宋黃策祠

新菴又名善慶在市墟舊為邵武知府徐公濟墓廬又

方池尚存西南為長旂嶺有鳳翔菴宋咸淳元年乙

丑僧椿壽建舊傳其下蓮池最勝今不存

五十三叅舊名善財房在本寺右永樂十二年萬峰的

嗣虛碧璿禪師鼎建隆萬間荒廢遂為民間別業崇

禎七年僧性乘同徒海慈募資恢復崇禎十四年蔡

懋德捐資為僧濟炤倡首重修

懋德捐資為僧濟炤倡首重修

懋德捐資為僧濟炤倡首重修

懋德捐資為僧濟炤倡首重修

懋德捐資為僧濟炤倡首重修

懋德捐資為僧濟炤倡首重修

懋德捐資為僧濟炤倡首重修

妙高菴在本山後萬曆丙辰年僧一輪開創崇禎八年
乙亥僧寂聞重修左有井清冽味殊

山居

紫雲居在舊法堂後初蔚禪師卓錫之地王文靖公汝
玉題扁其東上為東山居門徑幽僻林樾交覆中有
松雲堂尤多美竹廢今

南園在小山門東南下路數折而入皆松竹環繞又有
流泉經其左岡清潔可愛廢今

棲雲山居在禪堂西北結廬負巖開厨映竹臨眺澄湖

於長松之下青爽特甚左有瑞雲軒西隱皆高竹喬
松密布前後有危樓中聳推窓青鬱觀者灑然易慮
信佳處也樓左右有筠隱蒼雪二軒或題為竹塲云
並廢今建大悲殿於上碑記別見

古松山房地僻多美竹東小徑入澄湛軒尤靜美其中
和房壽椿房慶雲精舍萬峰塔院皆據巖壑勝處匪
其緣弗能居也

獅子窟在三峰塔院後崇禎二年己巳住持法藏構
巢居在善財房南崇禎五年二月十六僧清印建

香光室在聖恩下院西北崇禎六年癸酉十月法藏構蓮花居在香光室左崇禎十四年辛巳八月老宿海舒構於此專修淨業

歇心居在鐘樓東崇禎十一年戊寅五月僧濟長濟時同建

祇林在香光室北

鄧尉聖恩寺志卷之三終

鄧尉聖恩寺志卷之四

禪祖

聖恩禪寺開山祖師萬峰蔚公傳

承德郎刑部主事永嘉陳亢宗述并書篆

師諱時蔚字萬峰出溫州樂清金氏母鄭夢儒釋二人入其寢覺而生二子師居末適有光燭室鄭懼欲弗舉其姑保而育之襁抱中見僧輒微笑作合掌態父母度不可留使禮越之永慶寺昇講主爲師時年十一嘗誦法華經至諸法從本來常自寂滅相忽有省遂入杭受

具叅止岩禪師於虎跑示以南泉三不是語別入達蓬山卓菴佛跡寺故址晝夜究竟岩語至忘寢食一日寺主宗律師舉似瀉山淨瓶公案觸所叅卽說偈云顛顛倒倒老南泉累我工夫却半年當下若能親薦得如何不進劈胸拳遂往見岩詰前語獻偈云南泉正是惱人心更要將心去覓心不是心兮不是佛性天寬廓有何尋復之華頂訪無見覩公見問從何處來師云從杭州來曾見何人師云止岩和尚有何指示師云南泉三不是見云我這裡南泉三不是卽不問如何是萬法歸一

師曰從生至死皆無一又問如何是一歸何處師近前叉手云不審見云且居山保守還返達蓬獨處者十稔已而往伏龍山中謁千岩禪師初入室問將甚麼與老僧相見師豎拳頭云這裡與和尚相見岩問死了燒了向何處安身立命師云漚生漚滅水還在風息波平月映潭岩復云莫要請益受戒麼師卽掩耳而去明日復請衆斫松師拈圓石作獻珠狀云請和尚酬價岩云不值半文錢師云瞎岩云我也瞎你也瞎師云瞎瞎卽說偈云龍宮女子將珠獻價值三千與大千却被傍觀人

決破誰知不值半文錢岩顧昭首座曰蔚山主頗有衲僧氣味煩請歸堂比佛誕日岩上堂云今日有三種好事一者世尊降誕二者天道清明三者有大施主設齋若向此三種好事上識得老僧舌頭落處日銷萬兩黃金師從西過東一手指天一手指地云天中天天中天釋迦彌勒誰後先岩云大獅子吼過了也還有小獅子麼未幾復還佛跡岩遺以衣拂各一并偈一首見千岩語錄中既而移居嵩山閱九載岩三爲手書招之所以愛重期待者甚厚比至請與分座尋返嵩山岩囑云汝

緣在浙西可往化導大振吾宗遂以元末己丑年入吳凡三築精藍卒之玄墓鄧尉山中卓錫半山斬蒙羃結菴居之久之四衆歸嚮乃構爲大伽藍號曰聖恩自是緇素奔湊遠邇雲集師隨機開導俾滿意欲初不爲雕琢語故人益慕而信之一日忽沐浴更衣召衆訣別書偈曰七十九年一味杜田懸崖撒手杲日當天遂趺坐而逝時洪武十四年正月二十九日也龕留十有三日顏色如生傾城聚觀膜拜瞻嘆其徒普壽等奉全身合二缶瘞菴之西崗遵治命也師貌古而清髭鬚疎秀寡

緣飾千岩常稱其純粹質樸有古人氣象深得之矣師歿垂四十年吳人無少長咸知尊慕其行嘉湖諸郡至有繪其像而事之者其生卒之辰遠邇畢集如其生時而傑閣重樓逾增舊觀焚修之徒數常滿百巋然爲一大叢林雖宿號名山盛刹者或未之能先焉岩所囑者益又驗矣師平生未嘗讀書惟以深悟自得其形諸語默者俱能刊落浮華而一踐乎實其徒普壽等輯爲萬峰語錄一帙鋟梓流行然非師志也其所度弟子若干人而勝學無念者獨號能紹其傳云贊曰昔中峰普應

國師以臨濟正宗振耀天目得其心印者弟子千岩也千岩再傳而師實承之厥後無念學公復親受師衣法之付受知 太祖高皇帝龍章寵錫雲漢昭回天目淵源遂爲有托師所付得人矣嗚呼盛哉

永樂十七年八月二十九日徒弟比丘智璿立石

又山志舊載

萬峰禪師溫之樂清金氏子名時蔚始學於餘杭山中將出游辭其師千岩請所止答曰汝名汝所止也後至鄧尉將結菴其地乞諸葉承三氏葉初不許後見其智

慧能知未來遂捨與之始創精藍其徒大集師深造物
諦詞翰亦奇古嘗作偈題其山云玄高向午面朝湖三
鳳三龍天下無左右環盤前後濶此山真好立禪徒師
居此凡三十餘年一日告衆曰吾時至矣又囑其徒而
今而後汝等須向山間林下鑿頭邊接引一個半個闡
揚吾道不可攀高接貴輕慢下流逐利追名迷真惑道
如今末法將沉汝等慎之乃趺坐說偈曰七十九年一
味杜田懸崖撒手杲日當天語畢而終所遺語錄命悉
火之曰從上佛祖言說後學畧不聽從况吾區區杜田

話柄其門人掇拾所遺撰次成卷行世先是其徒鑑無
礙欲候師涅槃葬之金山師聞而致書謝焉其語尤異
又自題其像皆援古驗今詞旨蘄絕今寺西北有塔院
師葬處也翰林侍讀王公達善銘載異蹟甚悉爲開山
始祖

又

陸粲

吳西山聖恩寺僧時蔚號萬峰溫州樂清金氏子元末
名僧長千巖高弟也初學成請於師出遊師謂曰汝逢
汝名卽住至蘇州止於鄧尉山東麓曰玄基建大蘭若

初未嘗識字既超悟禪乘遂能作詩偈語皆可誦雖僧服而不去鬚髮自爲贊有束髮辦頭陀留鬚表丈夫之句洪武辛酉 朝廷聞其名使 徵之使未至之七日蔚已前知謂其徒無念曰吾與之無緣汝當 召吾今去矣遂沐浴入涅槃遺令母焚尸越十三日肢體猶溫以磁缸覆尸而葬無念入 覲大被 寵錫後往湖廣之九峰寺與蔚埒望焉蔚素精堪輿家常言玄墓形勢三龍三鳳勝絕天下卜葬者多扣之蔚未常輕答也老患疾氣語其徒曰吾當服城中沈以潛藥吾與之有緣

也彼在 京師今夕且歸矣宜往速之徒如教至沈氏則以潛初未歸也返命又遣之往及夜因寢其家門下待之二鼓以潛果歸聞其言異焉卽往治疾旣瘥蔚謂曰荷君治疾無以爲報有地於此請奉以爲太夫人壽域因指示竺山後一穴稍下六尺云是雖微劣至六十年後家大發後以潛竟以葬母至成化間以潛諸孫屢等皆富甲其里布政使杰諭德燾數人相繼取科第門戶赫奕距葬時恰及六十年矣予聞諸以潛末孫注者如此然留鬚之說實石室僧語意謂非蹈襲殆是偶合

耳

又續吳先賢讚

劉鳳

時蔚樂清人姓金氏學其道者稱祖焉傳法於千巖來
吳玄墓聚橡栗藜藿而食之或累日不進開立宗教建
寺設壇授受其徒甚盛名萬峰師洪武辛酉 召之蔚
已預知跌坐而逝 使至已無及數日肢體猶溫如生

無念勝學禪師傳

釋弘壁

無念勝學禪師萬峰嗣德安府隨州應山人父姓陳母
周氏元天曆元祀戊辰八月十九日子時生九歲禮本

郡寶林寺無極緣公爲師初不識字執苦經年自覺已
事不明往叅荊州無聞和尚開示萬法歸一一歸何處
公案師驟發大疑日夜提叅復歸寶林廿有二歲往宣
州登壇受戒後入嵩山住靜履影不出常穿一衲脇不
沾席精進逼拶一日豁然有省偈曰數載東山昏霧濛
凭欄終日待晴空夜來忽覩霜天月萬象全彰一鏡中
由是遍訪海嶽耆宿東抵姑蘇玄墓叅萬峰蔚和尚機
語相契峰親書法語付僧伽黎以偈證之復回寶林道
風昭著緇素敬慕後楚昭王建刹延師居之洪武間

太祖召至 奉天殿 賜坐 上問法要師進偈 上覽之大悅、御製詩文賜之今勒碑鎮寺永樂三年乙酉十一月二十九日師說偈曰世尊七十九無念八十邊打破華藏海依舊水連天儼然而逝世壽七十八僧臘五十七全身塔於獅子巖謚清福廣慧禪師

虛碧智璿禪師

虛碧智璿禪師萬峰嗣蘇州吳縣長山鄉顧氏子語錄未見塔銘存寺爲聖恩第二代住持

寶藏普持禪師

寶藏普持禪師萬峰嗣姓氏未詳語錄塔銘並無存但聖恩事蹟記中有僧錄實公爲撰靈骨塔銘萬峰禪師付法與師偈云大愚肋下痛還拳三要三玄絕正偏臨濟窟中獅子子燈燈續燄古今傳爲聖恩第三代住持

本義禪師

本義禪師萬峰嗣有語錄若干卷今失

普榮禪師

普榮禪師初參萬峰勤於問道猶兼苦行得峰激勵憤志參究七日而悟

碧潭道清禪師

碧潭道清禪師虛碧嗣嘗受知于巡撫侍郎周文襄公
忱延之住山所居有虬松倚巖結鶴巢於上趺焉語錄
塔銘俱失其行業載事蹟碑記爲聖恩第四代住持

聖恩道宗晏禪師

聖恩道宗禪師虛碧嗣蘇之嘗熟人語錄塔銘俱失景
泰中 詔修保國道場感五彩祥雲繚繞光明照耀特
降 敕褒諭師復於天順三年五月十九日奏 請寺
額有 敕文劄付勒碑永鎮於寺爲聖恩第五代住持

善祐禪師

善祐禪師虛碧嗣能詩有禪學亦於景泰中 召爲宗
師卒 賜諭祭

東明虛白慧崑禪師

東明虛白慧崑禪師寶藏嗣年十四於丹陽妙覺寺禮
湛然師薙髮受戒叅雲間松隱叩其心印然未心肯自
誓若不徹證不已因禪定六日出定舉首覩松豁然有
省尋至蘇之玄墓聖恩寺見果林和尚針芥相投復指
示見寶藏持禪師具陳悟因藏叱之曰佛法如大海轉

入轉深那得泊在這裏師遂親灸座下藏一日問曰心不是佛智不是道汝云何會師向前問訊叉手而立藏呵曰汝在此許多時還作這個見解師乃發憤忘寢食至第二夜驀然徹法源底呈偈曰一拳打破太虛空百億須彌不露蹤借問個中誰是主扶桑湧出一輪紅藏笑曰雖然如是也須善自護持時節既至其理自彰

海舟普慈禪師畧傳

海舟普慈禪師蘇之常熟人姓錢世宗儒業出家於破山初至慧日寺聽講楞嚴至但有言說都無實義處乃

曰言說今日愈多矣遂歸日夜閱經尋思實義面顏日悴有居士問曰師顏色有病師云佛法不明故爾非病也士曰佛法不明何不往府中鄧尉山問取萬峰和尚去師聞欣然便詣鄧尉見萬峰峰問曰沙彌何來師禮拜起曰嘗熟峰曰到此何爲師舉前話再拜求示峰便劈頭兩棒攔背一踏以脚兩踢曰只這是實義師有省起曰好只好大費和尚心力峰笑而許之付以偈曰龜毛付囑與兒孫兔角拈來要問津一喝耳聾三日去箇中消息許誰親又曰子當匿跡護持莫輕爲人師範師

自以爲得乃結廬於洞庭山塢廿有九年一日僧至師
問曰上座何處來曰安溪曰安溪有人麼曰有虛白和
尚說法不異高峰曰是誰弟子曰寶藏曰有甚言句僧
舉室中驗人語云心不是佛智不是道三藏不是法是
甚麼下語者皆不契舉畢復問師曰叅寶藏否師曰我
與寶藏同叅萬峰僧曰當日有何所見遂隱於此就再
不叅人去師曰問但有言說都無實義峰便打我從此
得悟僧曰請言得之所以師曰但要人知痛痒的是實
義是妙心言說盡屬皮毛僧笑曰若據此見解生死尚

未了何得云悟未在不見道心不是佛智不是道
耶師遂有疑曰彼處衆中有真大徹者麼僧云無師卽
棄菴渡湖往安溪詣東明適有人設齋師至關前問明
曰今日齋是甚麼滋味明曰到口方知說卽遠矣師曰
如何是到口味明卽打滅燈曰識得燈光何處着落味
卽到口師無語次日黎明遣侍者請師師卽至明問曰
曾見人否師笑曰見只見一人說出恐驚人明曰假使
親見釋迦依然是個俗漢但說何妨師曰萬峰明曰爲
敘先後耶爲佛法耶若敘先後萬峰會下有千人若論

佛法老闍黎佛法未夢見在何驚之有若親見萬峰萬峰卽今在甚麼處師面赤惘然明曰若如此不曾見萬峰師歸客寮三晝夜寢食俱忘偶值香燈繩斷墮地忽然大悟詣關前呈悟絲明曰老闍黎承嗣萬峰去師曰白公爲我打徹豈得承嗣萬峰明乃笑遂集衆出關陞座曰瞿曇有意向誰傳迦葉無端開笑顏到此豈容七佛長文殊面赤也茫然今朝好笑東明事千古令人費唾涎幸得海公忘我我濟宗一脉續綿綿乃擲下拄杖云千觔擔子方全付玄要如今拄杖談以拂子擊三下

下座師卽入方丈禮謝明曰老僧不出月去也至廿七夜辭衆廿九日示寂師仍欲遁歸洞庭四衆苦留乃繼其席萬峰忌日師拈香指真曰我幾淹殺你甕裏幸是普慈若是別人不可救也爇此瓣香堪酬接引喝一喝云只笑你護短沒頭師佛法當人情展坐具禮拜又拈香云此一瓣香供養東明長老一片赤心鞭策令余洞達宗源連喝兩喝云一言豈盡普慈心千古兒孫贊報恩又拈香云此瓣香供養昔日師僧指南之力若不蒙師何繇今日他日到來拄杖三十喫有分堪報不報之

恩喝一喝云受恩深處便爲家有乳方知是阿娘禮拜起說偈曰源頭只在喝中存三要三玄四主賓五棒當人言下會四料還須句裏明末後真機死活句箇中消息在師承碎形粉骨酬師德將此深心報佛恩慟哭歸方丈臨示寂說偈曰九十六年於世七十四載爲僧中間多少諳訛一見東明消殞以佛子打○云釋迦至我六十二世有不可數老和尚又打○云多向者裏安身咄乃投筆而逝在景泰元年全身塔於東明左側得法十二人

天壽聖恩藏禪師行狀

師諱法藏字於密初住三峰人皆以三峰和尚稱梁谿蘇氏子父蘭母周氏家世奉齋師生而穎異狀貌脩偉有大志八歲患痘疹值洪水破岸將及床見玄龜如盤師下床入水乘之因成瘵十五就醫于五牧之德慶菴禮佛心動遂念曰世間法無足聖者歸告父母求出家許之割田以給衣食囑曰必無爲經懺僧他日當拯我于塵勞也師謹佩其言然性高曠不事事留心筆墨間以事清散雖不能卽爲淵灝之學而闔題拈韻錯趾于

文人伍與廉憲薛純臺諸公爲世外交嘗語同輩曰吾四十當悟道六十歲死矣問者曰子不修行安期悟道師曰時未至尚當遊觀耳且公以何法爲修行乎聞者皆異之二十九歲見高峰語錄開卷悵然隱隱若能記憶遂決志參禪是歲受戒于雲棲又八年受具于靈谷又明年住海虞之三峰如是十餘年中費盡心力虛檐破壁草屋蘿牆食荳滓衣補綴不以爲苦嘗參萬法歸一一歸何處話目不交睫脇不至席夜中爲昏沉所罩師乃懸巨板于座側命徒衆分香擊板佛聲徹天每嘆

曰嘗言四十悟道若有可憑今三十有八矣而徒勞若是豈終負此語乎于是惶懼泣不自禁至欲養髮入醫卜不受十方茶飯俟叅透再來其懼罪福如此至萬曆壬子師年四十叅究愈猛必以得悟爲期適峰中有老宿朗泉者閉不語關師乘便求入才與老宿相拜卞忽眩暈吐痰斗許放身一睡五日不知人事會窻外有二僧夾籬折大竹聲若迅雷師自枕中躍起頓得心空至夜聞兩堂課誦鐘鼓之音如在自已身中歷歷落落毫無間隔覺得身遍虛空坐一夜如彈指復念曰此正古

人所謂前後際斷不可坐着乃盡力推究忽于青州布衫打失鼻孔凡祖師言句一時會盡自此觸處皆悟轉悟轉深尤于高峰睡中主得大受用乃作偈曰一口棺材三隻釘聲聲斧子送平生自從薤露悲歌斷贏得朝朝墓栢青嘗參三玄要四十餘日心不異緣痰癘發于左背自腫及潰了不經意後脫衣膿血膠凍始覺乃歎曰使我有師如汾陽輩當不致十年墮荆棘岐路矣言畢泣下既會得兩堂首座同喝意旨宛與覺範所著臨濟正宗符合一契如五百年前對面親印遂欣然奉高

峰爲印心覺範爲印法且傷覺公無後意欲遙嗣之又復携杖笠游浙東遡匡廬與得一二具眼者爲法中水乳而禪風絕響轉覺調高不第獅絃不振而師且幾爲破琴計矣于是閉門高臥唯以所得質之古人研極五宗之妙著五宗原時海內衲子望風雲集未幾太倉之慧壽吳門之北禪迎師開法師至不正位不登座惟隨宜起發而已或問其故師曰威音已後不許無師自任若一旦稱師據座則未得謂得者易啓便門吾罪深矣或指見五乳師曰此老固菩薩人也吾所欲嗣者臨濟

登真聖真寺志 卷四
兒孫何可因彼盛名更吾志哉後聞天童悟和尚出世
金粟師策杖從之甫至粟卽上堂告衆曰漢公悟處真
實學大而名先出世于我所以屈身來此者爲臨濟源
流耳老僧從來不易安首座今以累漢公卽日請師爲
第一座師請粟上堂粟舉百丈再叅馬祖黃檗接臨濟
公案師出衆禮拜起便喝粟云好一喝師又喝粟云你
更試喝一喝看師禮拜歸衆粟顧師復舉僧問古德云
朗月當空時如何德云猶是堦下漢僧云請師接上堦
德云月落後相見粟云且道既是月落後又如何相見

師便出法堂粟便下座由是師資道合若龍驤雲起識
者咸服吾師荷法之誠而天童之道亦自此愈尊矣未
幾請及堂與中事粟不應良久曰宗旨太密嗣續難乎
其人不若已之師曰不然黃龍有云學者欺詐之弊不
以如來知見之慧密而煨之何由能盡且古人建立宗
旨千牢百固尚有乘虛接響者混我真宗若師家大法
不明無從辯驗則胡喝亂棒羣然而起吾宗掃地矣遂
辭去粟手書源流信拂親至蔡子毅靜室面付師師不
受起更衣潛入舟中侍者密收之師覺叱曰辭受之間

大故有道何得草草竟作書辭還之曰聞和尚爲高峰的骨兒孫故訪大法于座下承一面相許謬及源流真如饑逢王膳所以未敢受者只以法中微密尚未脗合云云復遣座元一嘿詣粟謝過粟仍取源流付嘿曰漢公欲建宗旨出于至誠老僧但恐多事耳彼旣知此聽其自爲何拒之堅乎嘿拜受以歸師怏怏丙寅秋杭之安隱寺請師開法先是雲門湛和尚聞師煅煉學者有三七日中了畢大事之說終歲罵詈數爲魔外及見師語錄驚曰真古佛再來也是年安隱請湛說法湛以手

書邀師爲第一座師方至而湛先示寂檀越悟其旨遂請師開堂而天童悟和尚復遣僧齋伽黎至師始陞座拈香嗣天童爲臨濟三十一代正受海內衲僧北面之禮自此玄風大唱師縱其機辯以煅四方學者猶喜接賢士大夫多爲闡明河洛之旨間拈學庸諸書開其理障聞者如撥雲翳而士大夫亦樂從之如蔡雲怡劉長倩十數公皆親受印契嘗謂門弟子曰小得小悟誠不足戀直須窮盡源底得大歇場乃可耳妙喜云大悟一十八遍小悟不記其數豈欺我哉乃取覺範智證傳提

而滿之痛宗旨滅裂凡所演說極力匡救不嫌重複不顧誹謗不避名位但爲宗旨障者皆指而斥之弟子慮禍及請少貶師正色曰吾欲存趙孤耳夫程嬰公孫氏非聞道也義有所激遂爲人之所不能爲公等爲如來子而輕法惜身若是非所望也歲丁卯值文姚兩太史及徐氏諸護法請師住玄墓山聖恩禪寺寺先爲國初萬峰蔚禪師道場師于蔚爲十一世孫欣然應請及至蕭條荒落龍碑獅座盡置之荆棘瓦礫中唯舊屋數間而衲子幾無宿處師捐衣鉢率衆力凡有供施無公

私盡付修造開田鑿池以供禪侶而有吳江邑侯熊公魚山數造法席盡弟子禮嘗敘師語曰禘不知而指掌道無示以拈花三峰乎沫泗乎不可得而測之矣其敬服如此且爲助土木之役頓還舊觀俾酒人歌舞之場復歸叢刹師之力也然師開發洞達蒐微剔隱如秦鏡炤人肝膽畢現雖不欲易近者猶復歸之如過毘陵而郡守洪公半石下車折節聞法生信解任之後數千里馳書入山乞法名爲門弟子至維揚緇素擁護羅拜道側者幾以萬計杖履爲之不前至虎林士庶縉紳千餘

人日就聽法莫不凜然欽慕嘆未曾有師平時臨衆嚴
憚學者以爲寡恩師聞之亦不介意嘗見僧衣履鮮潔
誠曰老僧習性柔鴛不能身先風雨殆以早年未得親
近真善知識使汝等無所取法有愧先賢我之罪也嗣
是浮泛之倫稍稍引去惟法中數子雖饑餓不忍舍師
生平以大**慧禪師**笠子語接人更加精削使學者剝
去聖凡知見向觸背兩關不得處直下如銀山鐵壁往
往有三七日中撞斷消息者嘗榜門曰宅破家亡阿誰
是主縫開楔棒是何意旨掛拂捲席因甚不住新到下

語相契請以客禮見或者已爲諸方稱賞自謂飽叅造
師門墻咸遭點額又有四殺雄語爲室中鑪鞴苟非真
子難獲髻珠于是臬獍之徒兩相激怒使法中父子同
室操戈門外遊人吠虛指影師嘆曰法數如此豈能強
乎因慨然有離世之想矣甲戌六月冒暑歸故里重瘞
父母以竣其志隆冬過蘇閬遍詣檀越懽笑畢日囑以
山中常住若預辭焉乙亥春自松陵還脾病遂作師命
知事造龕索諸子悟由翻覆勘驗以宗印付之戒其住
山深蓄常住巨細盡付知事人乃以手書示清涼徹并

諸護法其畧曰白牛固水草尋常然而脚下無私要行便行矣又招劉長倩曰吾說法竟思欲大休然飲食如常木龕正造居士若來尚當一笑也于是遠近奔驟應接無虛日緇素索遺語手不停筆四月廿八日問龕成不知事以材木未備爲對師曰是何不相信耶命速成之至五月初二日謂衆曰吾不死但久勞筆舌思欲大睡一覺耳令以方丈爲死關署其門曰自埋顏其堂曰歇處指後地曰可爲塔基遂掩戶月餘雖弟子不見其面適雲怡居士同瑞光徹公入山省候請開關師從之

卽日命剖石壁爲聖恩第二代面囑蔡公始終護法又數日龕成師強起視之微笑移時復就寢侍者問如何是身後事師曰床頭老鼠偷殘藥壁上孤燈炤舊衣衆黯然侍者復欲問師舉手曰放下慢子着遂酣睡至中夜索浴更衣泊然而逝乙亥七月廿二日丑時也奉全身于方丈後入龕之日道俗數百人哭聲震地如喪父母師生於神廟改元十月初七日巳時閱世六十三歲坐三十四夏度徒百餘衆得法弟子十有三人起名受戒者以萬計門人集其平生得語錄三十卷廣錄五十

卷并弘戒法儀諸書行于世嗚呼臨濟七百年來正如
陰風晦日而忽有吾師挺出建大寶幢炤耀一世開鑿
人天眼目以振聳起瞶煅煉學者使滄沱支本向鄧尉
峰頭重懸日月而野干狐狗不得亂鳴墨儼所謂震古
一人無疑矣祖庭棟宇倏焉摧折佛法平沉此其時也
嗚呼痛哉嘗憶吾師有云七百年來起臨濟搥胸換手
哭蒼天至今誦之益令人潸然淚下也嗚呼吾師荷擔
祖道真不惜一片身心雖蹈湯火無所悔比來兒孫繼
出法道琳琅無不從吾師大冶中爲工爲匠或曰悟道

古人之難今師之門墻稱悟者比比皆是無太輕乎師
曰不然諸子旣舍父母割親愛從我遊于寂寞之濱爲
求出生死耳必欲盡其機用使彼深淺得入以盡吾心
吾豈效木羅漢不能說法專以避謗毀貪禮敬乎是以
一生孜孜務以接盡英傑以報佛恩今竟舍我而去矣
忍嘗憶初入山時纔禮拜師便詬罵不已旣退頗有疑
望後閱黃龍見慈明語趣還謝過始有今日嗚呼德音
已遠法乳難酬謹錄師之梗槩以昭來世然掛一漏萬
正如見日于盆盎之內而真日隱矣嗚呼

崇禎八年七月廿八日嗣法門人弘忍稽首百拜謹狀

附遺

師雖秉拈花之旨猶以弘戒選擇人根嘗于北禪寺註梵網而殿中佛像放光後說戒畢率衆禮開元石佛佛亦放光城中士民皆得瞻覩也

鄧山剖石大和尚道行碑

前乙丑進士河南浙江雲南道監察御史巡按真定等處法弟子密菴李模敬撰

臨濟真傳二十世而至萬峯蔚公次傳寶藏持公皆闡化鄧山越九傳而漢月藏公自三峯來恢弘祖道古刹復興慎推繼席益加大是爲剖石禪師師諱弘璧出

梁溪鄭氏父邦賢世業儒母邵持齋事佛謹師生而淵
渟嶽立齟年輒習跌坐父見異之曰此非塵網中人宜
歸釋氏九歲失怙卽知生死大事十二出家邑之普濟
十七爲僧樂誦華嚴宛如宿習二十二偕大樹證公謁
藏和尚於三峯令叅竹篋話無所得入精進堂晝夜猛
厲時聽石座元入堂舉萬法歸一諸因緣聞之如毒中
心益深痛憤至第三日夜半竟不知有身心世界時天
氣炎熱汗流浹體蚊蟲滿面偶舉扇一揮忽會得座元
所舉洞然明白遂作青州衫頌曰青州布衫重七斤齧

人惡狗踞當門喫飽飯團終日困翻身踏碎破砂盆晨趨方丈通所悟峯爲助喜盡心玉公見地超卓欲加勘驗立索祕魔杖頌師隨聲應之玉公首肯而去頌載錄中是時師年二十四冬就壇圓具遂發百城煙水之願往叅博山重其法律嚴肅依止最久歷黃檗匡廬還遊兩浙訪顯聖所至尊宿器重尋過金粟叅禮悟祖和尚終疑綱宗大法未透仍歸三峯深就爐鞴峯嘗指爲涅槃闍黎及峯主鄧尉命爲堂中主規不言而肅戊辰元旦與一老宿相拜下頓證玄要主賓臨濟用處峯大喜

曰正望汝到此田地方得真實受用不然非克家真種草次日峯上堂師酬唱無讓峯云真獅子兒善獅子吼復隨至方丈呈真佛真法真道三偈峯對衆云昔日涅槃闍黎今日獅吼闍黎從此一衆傾服復温研八載偶病就醫京口見五州翠巖古蹟若舊遊處乃結茆憇止乙亥夏峯示疾辭衆語人曰璧公悟處極好人品端莊下手有力求人下不輕此定案也遂手書招回付以源流衣拂囑令接續宗旨并示以偈有一朝惡狗變神龍四煞雄透盡諸家極奧宗之句時門頭安行者夜夢神人

輿擁一沙門而入曰聖恩主人到也明日師至峯卽命繼席力辭峯曰著卜者三衆志已決勿復辭廼拜受命逮峯順化闔郡紳士檀護啓請開堂時文文肅公湛持姚文毅公現聞劉大叅公心城胡水部公遠志蔡忠襄公雲怡皆留心宗要望風欽挹爲一時盛事云師登座卽提唱綱宗玄旨峻拔聞者欣踊師室中嘗設三問辨驗衲子有時云舉一爲用甚是現成你作麼生舉或云說得做不得做得說不得此人祇見一邊你作麼生兼又云有頭無尾不得有尾無頭不得如何得頭尾句諸

方罕有契機者師每闡揚玄要旨趣隱顯機用煅煉英靈然一本諸誠心質行悉剷枝葉德風薰被一種平懷能致遐邇咸孚雲奔川屬檀施自輳百廢具興如天山塔院首事崇巖若大雄天王兩殿伽藍堂祖堂若還元閣白衣閣法堂大悲壇四宜堂純白窩等規製維新繚垣界道閎壯精麗遂爲三吳寶坊之冠旣請大藏建閣尊奉又念像設爲末法所重廼購梅檀遶塑工躬親指授造寶像數百軀羅供傑閣徧令瞻仰者卽修普賢禮敬稱贊之行此乃從權化導之餘力而師之深心塵刹

亦見於此師平日恒掩關寂坐四方名碩嚮道諮叩足不離繩牀口不譚塵事語惟真實相爲皆益信其高簡率任不覺屈膝申弟子禮焉師旣屏跡城市聞天童悟祖訃遠奔盡忱法中耆老咸誼重之尋過育王禮舍利塔先是守塔僧語人曰夜夢一大善知識來禮塔是日師適至復造天目掃高峯中峯斷崖三祖塔時中峯塔燬于火師歎曰是吾責也召匠庀材陶甃重爲完治迨甲申乙酉間城鄉騷動鄧山濱太湖湖寇猝至左右請避之師曰吾誓守先師靈塔耳無何寇退守帥率兵追

逐左右復恐師曰毋動伽藍足憑也果無事人皆服師定力師晚年益棲心華嚴常以法界義海與學者印契心宗每向道俗拈示輒疊疊數千言不休牧齋錢宗伯曾博通賢首入山咨決曰和尚真華嚴會上法身大士也師見晉水法師著普賢行願懺尚未該備手加補訂務與貫華宗趣脗合復相山中善地創構華嚴壇高朗嚴靚精擇梵衆六時修禮感佛中夜放光先是廣購華嚴古冊祕函幾及百部悉貯壇內師又以方冊世無善本字句襲訛乃延十大高德精通教義者研覈付梓兼

標圖說印送名山流通四遠咸奉如金牒瑤勝焉或曰
師擔荷大法祇合高提祖令何汲汲以華嚴爲重師曰
是余宿願也法當秋晚鹵莽流輩罔知修證狂慧自矜
非以此經策發大心曷知全修卽性乎師以年近七旬
疲於應接思曳杖他往致請靈隱禮公主席諸護具書
懇留師憫衆誠緩其行適太傅息齋金公詣山拜請以
北寺古塔與金陵報恩竝尊且闔郡龍脉攸繫非仗和
尚清涼法幢曷能重新爲吳人士造福師遜謝太傅申
懇再三乃勉應會師七表緇素多有供獻悉歸諸塔工

師殫慮區畫剔基展界檐楹軒檻中堅外暉致感舍利
騰光金容現彩靈瑞衆矚不能備紀爲是神通自然抑
豈功勳邊事華嚴十地品云雖知國土如虛空而能以
清淨妙行莊嚴佛土師之謂與是役也始於丙午中秋
告成於己酉五月師旋擬還山因事說法辭諸檀護億
衆喧擁請留使杖錫不得前師且應諾而意已心厭世
相決意謝山中院事十月出衣鉢散衆併贈貽諸鄰峯
旣登堯封敦請靈巖儲公主席固辭仍勉徇兩序請應
求戒者曰聊借作滿散道場可耳臘八後入城別諸道

故復上塔禮佛諄誠諸執事還山遣書招回妙濟石將付院事二十七日周巡衆寮集兩序勤舊苦切示誨復率衆拜掃祖塔受常住年齋至晚普薦徧禮悉如往例事畢還方丈且行且語勅汝後輩各自努力及寢室行數步就榻趺坐若假寐然視之已儼然逝矣卽是日之亥時也世壽七十二僧臘五十六說法三十五載學者入室必委曲折磨稍不契輒正色厲辭責之嗣法首付巨冶教德爲宗吼崖石月航函乙未付佛幢華一峯徹幻菴時丁酉付文水恬佛日覺物外淨己亥付石樹岳

道林至克初岱化雨震魯石琦乙巳付仁山震戊申付水鑑朗復歸住黃龍又付一源聞己酉付梅屋益石浪樞肯堂學朗真純遺衣付鶴山志一月印止菴勇見住世者雖隱顯迹殊各任弘化手度弟子暨方內外與餐法旨不可數記受戒法者累萬師嘗垂訓云傳持道法當行同佛祖法華安樂行品汝等終身誦之座下每抄錄師語屢請梓師不許曰三藏尚爲故紙以吾言爲禪取乎活祖師意不在此師之識鑒雲門偃後不多見也迄黃龍朗至力請始刻八卷吳太史梅村爲敘內云法

印相承之者宿修證最久猶慎重若是大異乎朝叅承而暮撰述者蓋亦以諷世云華頂震別有自集廣錄師平昔却觀覽不向外緣無嫌寡韻崇戒律飭細行寢室中敝履補綴不忍棄布視必自浣濯頰面終身用小盆未嘗多使水非閱經不爇一香凡餽獻者卽令供佛覲施絹帛則裝飾法寶衲子具儀請見者必返之襟度坦易無忤容然不喜逢迎貴顯不樂與噉名客作緣叢林佻脫之習欲令優人作伎爲供師以不可詔後學卒止之其嚴冷又類如此徐孝廉侯齋謂師天下遠近無一

間言豈非衛道之嚴荷法之重躬行實踐之所致是真知師者歲辛亥冬門人奉師全身塔於華嚴壇後師畢生尊信華嚴符師志也余瞻奉師垂四十年重師心行以實不以文茲据行述叅見聞不敢加藻飾之辭期無欺於後世爾

康熙歲次庚戌孟冬嗣法住持濟石立

以實次以文... 聖恩寺志... 卷四... 三...

鄧尉聖恩寺志卷之五

名釋

善信傳

釋明河

善信字無疑蘇州嘉定吳氏子年二十九削染為僧不
 識一字唯事禪那入玄墓叅萬峰和尚忽有得謂眾曰
 我自出家以來脇不至席今日始了當矣未幾示微疾
 索浴入龕畢于彈指間歛然火起自焚其身是蓋得道
 急于入滅者也或贊之以偈曰一念纔空萬境忘更無
 餘事可商量翻身永入火光定驚倒靈山老藥王出輪

迴又入輪迴究竟何曾有去來昨夜冰河中發焰虛空
燒作一堆灰

山志舊載

德昌德珎皆篤於修行珎於揚州結萬松菴以闡其教
後歸山鑄銅觀音像吳文定公爲記

靜戒性穎異篤修淨業尤明經論機辨風生時號法門
梁棟嘗遊歷名山楚王製山記賜之壽九十終庭有兩
高竹玉立若侍卒之日忽爲風撼而折人咸異之嘗題
佛像云紅日光中坐得安衆生業海自然乾分明想像

河沙數鼻孔原來沒兩般

文端靜之徒能詩尤善學松雪書晚年精進修行遂得
解悟臨終自書偈曰七十九年種種隨緣今日歸去神
孕九蓮趺坐而逝其書視平日所作風格特勝

大魯端之徒持戒清苦口不言錢財足不入城府者四
十年嘗遊天目道經廬里始知塵境之紛冗其修行老
而益堅自戒至魯三世皆能持律僧徒推其精詣云
道純明遵自堅宗惠明賢惠傑皆良僧純于寺中多所
興創遵營別室幽勝名公多賦咏之宗明與堅同入山

苦行有文集尤善寫蘭石傑孤清自守不妄募人而人
慨施之建諸堂宇亦于本寺有助焉

七寶泉菴僧慧順奉慈菴僧來復本亭皆元時名釋順
自結菴一榻之外無他物或欲廣其室力拒之斯禪衲
之孤介者也少師姚廣孝銘其塔復字見心最名能詩
卒于洪武中與亨俱有集行世

相首座雲南靈谷寺僧禪定山中四十年茶毘有五色
舍利惠堅亦雲南人弘治間棲于山中十年嘗作偈贈
惠傑云本性真源獨不清陰雲散後卽嘗明從茲識得

渠儂了也不白兮也不青

近代尊宿

達觀真可禪師萬曆間入山覩本寺荒落殿宇傾頽遂
有興隆之念付囑曇旭曉公鑄鐘建樓以補巽方之缺
因作偈曰沿門乞得萬觔鐘次第靈文鑄七重一撞一

聲經一部天寒莫怯五更風

有紫栢老人集行世

憨山德清禪師于萬曆末至山後與仲容徐孝廉書云
山野夙慕吳中多君子高義薰心非一日矣適來幸覩
光霽與二三勝友濟濟一時之冠良慰下懷且辱慈愛

之深法施之厚顧山野涼德何以消受信心檀度撫膺
增愧報德無稱行時匆匆未及晤別尤爲耿耿華山承
尊慈發廣大心振支公之緒業開法道之重關惟此功
德自垂不朽喜有巢雨二法師爲一時法門之眼目何
幸得公作金剛幢此又法門中沾恩不淺也昨至鄧尉
觀其山水勝槩當爲吳中第一道場所幸賴公保持山
靈自當時時稽首但念此山爲我朝禪宗發源之地
乃聖祖崇教重僧第一之明命西來道脉傳燈賴此
爲印證殊非他山古刹比也鄙意願公喜施璿師退居

爲中興檀越倘得茲山重開不惟昭聖祖護法之心
抑令慧命不斷而此功德祝公之子孫繁衍其福當與
太湖七十二峰同其高深又可擬議哉深知公明達素有
此心故敢冒昧以請然非山野一已實法門之大望也
惟高明諒之又與文湛持姚現聞二太史書云山野生
平足跡未達吳中蓋夙慕山川人物之盛切恐終身有
負此心何幸垂老遊目得遇諸公勝友一時人倫之表
聊慰下懷仰辱法愛甚深匆匆言別未及深談中懷有
所未盡嗟嗟老矣後會無期當與諸公結龍華樹下緣

耳華山承二公贊成仲容公已發大心其究竟又在二公法力所持也前坐中談及鄧尉之勝當爲吳中第一道場及讀豐碑爲我 聖祖崇教重僧之明命乃禪宗傳燈之首倡殊非他山前朝故事比也所幸仲容公保護至今不爲狐窟倘得發無上心喜捨智璿退居以全法門之完璧惟此功德福利不可思議是有望于二公贊歎助揚之力也此山野爲名山道場惜爲仲容懿德勸非區區世俗一己之私也倘遂下願則華山鄧尉兩名刹皆仲容重開則法道之興功德不讓其他矣何如

何如惟高明諒之時因匆匆未及面別舟次京口附此

以謝

有夢遊
集行世

古心馨律師萬曆三十七年八月間在山說戒大闡律宗時寺宇頽敝法屬陵夷佛土山場岌岌不守申文定公時行手書梵天閣懸扁於上頗作山門之鎮寺址不漸爲豪右所侵矣

鄧尉聖恩寺志卷之五終

鄧尉聖恩寺志卷之六

聖製

太祖高皇帝御製居山圖序詩文一軸

諭僧無念

佛生西乾為淨飯國王子既長悲憫衆生罪重巍山愆

深曠海因是有警于累世因緣遂入雪山棲巖屋

樹六載道成歸演妙法

天人咸聽其所說也為成非非成生死死死生其釋迦之

道靈通上下妙貫三界博被寰中此其所以尊稱

大覺金仙爲此也邇來通靈侯奏秘知有僧無念者方今羣僧中是僧神僧者也陛下可召會之於是卽遣內臣帆舟星馳數日抵武昌東土橋召起又數日達京師卽日面見朕目是僧雖壽有年其頂相巍然色身俱備者嗚呼自童子忘慾至于壽高自受業而成人辭本師之座雲水寰中尋方問道謁高明而不已方乃內觀噫身外無身戒外無戒在處有佛又何指方尋佛本性卽佛佛外更有何佛佛外更尋他佛又何佛有之哉今無念定若

巍山戒昭日月於斯之時獨出世僧他日脫去其名長壽如月在天世猶諸水所在有水無水不月豈不千江有水千江月萬里無雲萬里天嗚呼久同天地名垂不朽僧無念者也

題僧無念九歲出家

從師童子問清玄世事茫然學坐禪幼出漸知心是佛老來悟得性通天朱門不謁藏金錫茆屋無干飲碧泉召至九重談妙法問伊落魄幾經年

覲畢舟歸武昌

舟行帆飽舵機玄船室堪栖老衲便兩岸樹催風
力健一江波湧蜃威鮮邯鄲誰問黃梁夢少室渠
叅不二禪午夜雪山星忽見前三三是苦空年

送武昌歸隱

躡雲深入萬重山回首煙村遠世間初夜不聞三
弄引五更惟覺四時寒天香馥郁盈禪悟月色精
英炤影閒比似市廛車馬集此心無事與相關

懷僧無念特賜松實詩

并序

朕於庶務隙中將世人心意較之是非析之兩端

思之再三謀之不已其人之情意變態多端倏此
忽彼是非混淆紛然艱析朕閱人既多歷事且久
尚不能治不善而安善良于仁壽之鄉此果不師
古而有此也抑人心不古而亦此耶嗚呼靜觀熟
慮人之情意始古至今倏然忽然反覆不常艱于
治化古人有云犯刑憲如飲食嫉良善如讐隙信
有之不誣也嘗聞西方有大聖人不教而化不治
而不亂此大覺金僊之道也朕於繁慮中視踵佛
之道者能如是快矣哉出三界而不輪迴神通妙

用無礙於上下逍遙乎兩間常云出世斯出世也
前者僧無念戒精明於皎月定慧穩若巍山蹇來
一會去此常懷懷之不已遣人就見特以松實供
之兼以詩勞之
志空五蘊隱藤蘿深行由來積歲多山鬼鑒知常
擁護水神到處每攜訶戒如皎月天將悅定若巍
山世欲歌幾度有時思善者命齋松實詣磐陀
賜僧無念詩用前松實詩韻

談空幽隱入煙蘿路合蒼苔歲月多問道無門明

五教進齋何處受三河殘經對月從容誦補衲朝
陽自在歌侶影山間真寂寞儔燈松下任坡陀
大明洪武三十年丁丑九月十八日臣僧勝學刻石

天壽聖恩禪寺建幢演教元季乾綱解紐而值神
僧萬峰蔚禪師出世於此開山說法是以十方檀
越趨向僧衲皈依叅禮于座下者莫可勝紀時無
念禪師生而神異九歲出家超然有脫幻之想遂
入蔚禪師之室爲嗣法弟子道之所存梵轍之所
存也四方擾攘慮道之不行爲憂際遇

太祖高皇帝龍飛開天舉義兵削除暴亂乾清坤寧兩

賜時若沐浴

寵遇之恩至優至渥者也蔚師入大寂定所遺無念禪

師之偈有佳聲贏得震中華之句蓋知其為靈山

授記再來僧也雲遊行化於湖海涉八閩至三湘

駐錫於九峰招提以廷臣通靈侯秘知奏聞

皇上遣中貴官淺淺捧帛召至

京師熏沐更衣朝

見於

奉天殿賜坐作詩一章四韻以

進其辭曰萬機之暇究真玄百草頭邊佛祖禪毛孔

徧含塵刹土毫端現出性中天定迴坐看雲橫谷

行樂閒觀石湧泉林下衲僧何以報祝延

聖壽億千年

御覽大悅及應對皆合

上意既還九峰

御製詩文錫賚之厚古今高僧所莫及易世所未有也

無念禪師喟然曰出山住山不無彼此當知法身

法性繇受業道場之所自出故以所刻詩文命其
法嗣智璿重勒于碑以詔後世璿師夤志證無聲
三昧今主席清禪師乃無念禪師之三代法孫善
繼善述不忘先志感

聖恩之所重仰

佛功之所符礮石翻鐫爲山門之永鎮

景泰五年七月吉日直隸蘇州府知府臣汪潁識
住山三代孫臣僧道清立石

景皇帝諭道宗禪師敕

皇帝敕諭僧人道宗比因災異朕思係國安民之計旣
自修省復命爾衆於大隆福禪寺修建保國護民
金光明懺道場凡一百日屢有五彩祥雲繚繞光
明照耀此實繇爾能體朕志精白一心闡揚慈教
是致

佛天降格現大吉祥爲我國家隆長民物阜康之兆茲
特降敕褒諭爾其永堅乃誠祚我神化於無窮可
故諭

廣運

景泰六年十月初一日

之寶

鄧尉聖恩寺志卷之六終

鄧尉聖恩寺志卷之七

奏疏

奏請寺額疏

直隸蘇州府吳縣聖恩禪院住持僧臣道宗謹

奏爲乞

恩頒降寺額事臣本民人慕道出家離俗叅究宗旨景

泰六年

詔建保國道場行取海內僧衆臣濫入徵中遵赴

京師其原住鄧尉山聖恩禪院係勝國至順等年間

登原聖恩志 卷七
臣師祖萬峰時蔚結茅卓錫道行精堅感激四衆
初建禪院有僧勝學遠來投叅頗得深解
高皇帝召對稱旨

賜坐

賜詩歸隱武昌而禪院屬僧智璿嘗住璿復起建佛閣
鐘樓殿廡像設領率僧徒叅禪學道上宣

聖化下覺愚蒙共稱選佛之場實占名山之勝但未請
賜額何敢遽稱叢林幸臣奉
詔入都值

陛下降旨清理天下梵刹臣所住聖恩禪院誠無叅供
佛祝

釐臣不揣冒昧伏懇

聖恩敕下所司勘實

准將聖恩禪院改爲聖恩禪寺

賜額昭垂則頌

天壽于無疆莫

皇圖于永泰臣無任激切恐懼之至爲此具本親齋
奏

聞伏候

敕旨

天順元年二月

日

公移

欽賜寺額劄付

禮部爲乞

恩頒降寺額事據僧錄司申備直隸蘇州府僧綱司申

據吳縣光福等寺住持首僧宗傑等結勘得聖恩

禪院的係萬峰時蔚禪師於元至順壬申等年間

開山刱建以來正統年間有僧智璿亦行蓋造萬

佛寶閣鐘樓廊廡殿堂佛像俱全每遇節屆僧衆

焚修祝延

聖壽補報不缺及勘得道宗係嘗熟縣民籍出家本院請給度牒僧數並無違礙等因將本司官吏僧衆不扶結狀具申轉繳到部案查天順元年九月初五日於禮科抄出直隸蘇州府吳縣聖恩禪院僧人道宗奏稱本院蓋造完備乞

賜寺額等因具奏抄出爲炤恐有窒碍已經行勘去後炤得先該本部題爲重請寺觀額名事除已奏請見行炤勘者候回報至日另行覆奏其已有額名者不許再行奏

請已經奏

准除欽遵外今據僧錄司申稱前因係未

奏奉之先行勘之數既已直隸蘇州府僧綱司官吏僧衆結勘聖恩禪院僧人道宗所奏前項緣繇並無違礙所據奏

請寺額係出

特恩未敢擅便定奪天順三年五月十九日本部官於奉天門題奏次日奉

聖旨與做聖恩禪寺欽此欽遵擬合通行除外合行給

割本僧前去該寺住持領眾焚修施行須至割付者

右割付聖恩禪寺住持僧道宗准此

天順三年五月二十八日對同都吏吳暹

乞

恩頒降寺額事

割付押

併天壽寺額割付

僧錄司為住持事據直隸蘇州府僧綱司申據吳縣光福等寺住持首僧道昕等呈本處古有天壽

禪寺消廢年遠存有下院聖恩禪菴近有僧道立告奉

禮部勘合割付行下體勘明白准令搬移牌扁就頂原寺名額接續香火今炤本寺係是名山雲水僧人往來數多缺僧住持今眾議得白馬禪寺前住持僧道清戒行老成見識通達堪為本寺住持理合舉薦轉達請給割付來住相應具申據此案炤近奉

禮部割付為分豁事行據直隸蘇州府備吳縣申

開勘得本縣十九都天壽禪寺已行消廢遺下前代寺額牌扁及祝

聖萬歲龍牌有本都聖恩禪菴係本寺下院見今殿堂廊廡俱各整齊若將天壽禪寺扁額及祝

聖龍牌於本菴安奉就頂名額接續天壽禪寺香火祝延

聖壽則僧俗人衆莫不欣喜官吏里老僧人保結具申到府備申繳到部案炤先該通政司狀送僧道立係前項府縣僧告有本都天壽禪寺消廢要將遺

下牌額搬移聖恩禪菴安奉未委虛的已經數行查勘去後今據保結是實除類行直隸蘇州府着落僧綱司并吳縣審勘相同聽從搬移安奉外合行劄付僧錄司轉行知會施行奉此依奉已行去後今該前因除將本僧審供明白外合行出給劄付本僧前去入寺住持領衆焚修祝延

聖壽須至劄付者

右劄付天壽聖恩禪寺住持道清准此

正統八年九月十九日

劄付押

初恢復虛碧禪師退居帖
直隸蘇州府吳縣爲恢復舊址以完寶地綿法脉
以弘正宗籲恩給示勤石永垂不朽事據生員徐
元鼎陸毅等連名呈詞內稱竊炤鄧尉山聖恩禪
寺係

敕建古刹自洪武以遠正景
列聖之恩遇彌隆繇萬峰以及道宗梵宇之莊嚴愈整
堂寮殿閣具見堅完泉石峰巒備諸名蹟向稱祖

師道場誠吳中第一勝槩也今萬峰禪院居大殿
之右係虛碧璿禪師之退居院立靈骨塔於中迄
嘉隆年時移事改僧徒寥落寺基半屬民間而院
址遂爲徐季廉仲容別業季廉念係佛地久欲施
捨適萬峰的派嗣孫漢月藏禪師飛錫吳會季廉
于易簣時囑姪官生徐樹藩暨托孤叔生員徐泰
寧徐用徵立契送縣印鈐施捨旋蒙文姚二太史
周銓部及張朱兩春元庠生王景臯等延請本師
秉教主持于內說戒叅禪焚修祝頌用恢名利以

綿法脈至崇禎二年蒙吳江熊父母特捐清俸同鄉紳趙沈兩中丞孫方伯徐中翰吳顧二春元等于退居院址鼎建拈花堂甫鳩工而碑銘出字跡宛然具在而虛碧禪師骨塔亦備載于上此孝廉張異度朱德升簡驗舊跡查院後有空地一帶舊爲璿師方丈基亦爲徐孝廉家人吳仁所得伊主叔生員徐泰寧復倍價贖回并捨拓基議重修建仍發願募田得善信金光儀馬崑岡杜應魁等共置田五十餘畝以爲嘗住飯僧之產勝地勝因非

嘗勝事善人善果廣闢善門雖闡釋宣慈實體國贊化矧鄧尉擅姑蘇名勝郡邑風水攸關今旣合衆心以復精藍必仰祈明示以垂鑑戒庶緇素凜遵臺法僧徒恪守清規惟此冒昧陳懇伏乞洞察下忱俯賜給示給帖以便勒石遵守俾古刹重光法幢永固福生闔郡德頌千秋等情前來據經出示諭禁外合再給帖付炤爲此帖給萬峰禪院住持查炤帖文內事理永遠遵守不拘基址房廊田土木石等項凡係嘗住之物敢有私行更變改賣

登真聖恩寺志 卷一
者卽指名呈縣以憑盡法懲治通同隱蔽者事發一體重究以後承管僧徒務承先志仍勒石曉諭永垂不朽須至帖者

右帖給萬峰禪院住持僧准此

崇禎三年五月十九日吏陳象亨

恢復舊址等事

帖押

憲題寺額帖

直隸蘇州府吳縣爲出巡事蒙

巡按蘇松等處監察御史陳

憲票內開鄧尉山

聖恩禪寺係

敕建古刹近經諸縉紳捐資鼎建法堂漸復萬峰之舊殊爲勝舉相應給扁以垂永久等因蒙此除備扁差官導送本寺懸挂外合行給帖備炤爲此仰萬峰禪院住持僧務須約衆恪守清規共遵明禁一應遊方僧道細查來歷毋得濫容投住其閑雜人等尤不許混擾所有各鄉縉紳捐捨及置買山地并蓋造房屋等項俱永歸常住相傳以綿香火如

有私自棄賣致廢基業者許僧據實呈縣以憑盡法究追施行須至帖者

右帖給鄧尉聖恩禪寺住持准此

崇禎六年三月廿二日給

出巡事

帖押

天壽聖恩禪寺萬峰禪院免役碑

直隸蘇州府吳縣爲開荒裕

國行苦功全懇憲准批免役以垂永利事於崇禎七

年三月初七日奉

欽差總理糧儲提督軍務兼巡撫應天等府地方都察

院右僉都御史莊

批據本縣十九都三四五等

圖糧塘理排虞塘姚萱孔蕙祿李彩春張德魁馬

六朋張王顧徐僧壽顧纓望馬王察姚五朋顧郁

王馬五朋等呈詞前事呈稱本縣鄧尉山下山田

百頃向來草蕪盈野蓋地高而湖流莫輓山淺而

溪澗無瀦十歲九荒業戶經賦無出敲筋竭髓值

有戒僧玄峰卓錫本山偕徒弘淨思發願力鑿池

畜水廣資一方灌溉充辦稅糧兼助衆衲饗殮免募檀越隨荷鄉宦申尚書文姚二翰林蔡叅政各助俸金召買荒田三百餘畝兩僧自罄衣鉢每田十畝損一畝濬池一畝堆土耕獲登場止十得其八且費兩年開墾工力代納荒糧在山中實邀莫大之功於僧伽僅沾微渺之利凡開池積土所占丘塍其惟正嘗供以後皆僧賠補則糧差里遞諸役區畝民甲共甘往義不忍以俗累僧先該塘等具呈前任陳知縣署印王同知見任楊知縣俱蒙核勘得實並批永免差徭給帖付炤但查長洲縣接待寺曾有士民喜捨僧田俱蒙

撫

按兩院批准免役矧今二僧更有開荒普濟功勞

若不叩明憲天或時移事改今日胼胝之勤翻致他年踐更之擾伏乞恩憐准批吳縣將玄峰弘淨二戶僧田免役緣絲立冊勒碑庶山區利賴嘗存名藍香火不絕等情連名呈院奉批各宦捐資置田二僧開荒輸賦此舉急公普惠大矣仰吳縣查炤立戶免役置冊勒石以垂永利繳又蒙

巡按蘇松等處監察御史祁 批呈前同事蒙批
該寺所開荒田與民間不同既已陞糧自當免役
仰縣查其所墾并召買字號給與印帖永爲豁免
仍聽寺僧立碑遵守併不許胥役以清田爲名稍
有擾累此繳等因蒙此案炤先于崇禎六年三月
初三日據糧里虞塘等呈前事該本縣知縣陳
批僧玄峰等供奉香火不堪充役准豁免續于本
年十月初四日據鄧尉瑞光僧玄峰弘淨呈爲懇
乞炤例免役永守嘗住僧田以弘化澤事呈稱鄧

尉瑞光千年古刹自法祖開山歷朝錫額至

熙明恩賚尤隆峰等荷蒙闔郡士紳推舉請白當道守
護招提祝延

聖壽祗恐外緣有時斷續香積不繼晨昏賴司馬申公
翰苑文公姚公叅藩蔡公助買荒田三百六十畝
鑿水成渠開墾播穀隨該十九都糧里虞塘等呈
蒙前任陳知縣批准免役在案今續有官戶顧明
等捨田一百五十四畝零理合一併收明分立僧
玄峰弘淨二戶歲辦糧折伏乞俯念名刹香火上

出賢紳喜捨下繇貧衲墾荒准炤堯峰山飯僧田
事例永免差徭仍給帖樹石以垂不朽庶無絕食
之艱佛有嘗明之燄等情該本府署縣事王同知
批開准給帖勒石又于崇禎七年二月二十二日
據僧玄峰等呈同前事該本縣楊知縣批開本寺
土瘠賦重既損十之一二以貯漑正供足矣重苦
之役乎况以結佛緣亦不應役也准炤前例免役
仍勒石永炤等因各在卷今奉批除遵依給帖并
註造圩號坵形圖冊印發收炤外合行勒石永免
差役爲此備抄前繇查將鄧尉瑞光二戶僧田數
目分勒碑石着令玄峰弘淨掌收歲租供辦
國課仍聽傳流濟宗真派永爲聖恩上堂說法安衆
叅禪學戒嘗住供億之需並不許私自析產分房
別爨或典賣僧俗及他方游衲搯身侵奪尤不許
里胥區惡假托公事朦朧報役擾害謀占違者一
體治罪不貸須至碑者

計開

鄧尉天壽聖恩禪寺萬峰禪院僧玄峰開荒

免役嘗住田三百餘畝坐落十九都四六等
圖臨深盡命等字圩

崇禎七年六月

日知縣楊雲鶴

縣丞周乃祺

主簿劉貞

典史張維

監寺濟上立石

再恢復聖恩寺址帖

直隸蘇州府吳縣爲梵宇鼎新寶地初拓顓恩給

帖鐫石永垂丕振宗風亘奠弘基事奉

欽差總理糧儲提督軍務兼巡撫應天等府都察院右

僉都御史張批據鄧尉山聖恩寺監寺僧濟上

等呈詞內稱切炤鄧尉山聖恩禪寺係

敕建古刹有

太祖高皇帝諭無念禪師碑

景皇帝敕諭道宗禪師碑

英宗皇帝賜額御劄碑森然臚列歷代洪恩

錫賚甚厚殿閣廊廡輪奐莊嚴向稱萬峰禪師道場誠

三吳第一名勝也殿右係虛碧禪師退居院立靈骨塔于中迄嘉隆間時移事改僧徒寥落寺基半屬民間而院址遂爲徐孝廉仲容別業孝廉念係佛地久欲捨施未幾仲容疾革于易簣時囑太史湛持文公現聞姚公銓部蓼洲周公族長徐慶生嫡姪徐公宣諸文學立券吳縣請印施捨前院仍建佛宇延請萬峰嫡派嗣孫本師三峰漢月和尙住持時有吳江令魚山熊公中丞蓋菴趙公弘所沈公方伯同玄孫公各捐俸資鼎建大法堂以續

萬峰第十一代正脉甫鳩工而碑銘出雖淹荒草字跡宛然而孝廉張異度朱德升同驗舊誌迺知院後空地四十餘畝係璿禪師方丈基爲徐孝廉家人吳仁所得伊主叔生員徐泰寧倍價贖出併捨拓基今建大悲殿三峰塔院于上殿左舊爲鐘樓年久並廢後僧曇旭復鑄鐘甫就而曇旭物故時閣殿俱爲颶風所搖棟析榱崩聖像剝落其徒體慈緣淺力綿弗能修整公同生員沈伯修同山僧月林覺如及地方徐太和等公立議單將殿閣

鐘樓悉交付本師次第修建今始煥然鼎新并坐
山一帶計三十七畝此係體慈立券通共受價一
百兩以爲衣鉢之資賣與本師俱係諸檀越樂施
以襄勝舉又閣後有已廢天開圖書基址二畝四
分體慈售與杭僧寄浮結靜室於上侍御慶繩葉
公大叅雲怡蔡公以此地關係一寺風水特捐七
十金連屋基地買出捨與本寺嗣法住持剖石禪
師永爲佛地今將蓋造碑亭豎立

景英

二帝御碑永鎮于上以杜僧俗侵占之患又因山居

乏糧承大護法申文姚王蔡李顧諸縉紳同各郡
邑大檀捐資約置沿山葑田三百餘畝建大義堂
等永爲飯僧功德院其田俱係磽瘠高壤歷歲荒
蕪今闢池沼以資浸灌方可播種蒙前任

巡撫都臺莊 巡按憲臺祁 給帖蠲免一應徭
役恩霑萬禩凡此勝地勝因善人善果雖闡釋宣
慈實體

國贊化既合衆心以復精藍必祇

憲檄以昭炯戒庶緇縻素凜遵臺法罔敢侵漁僧徒

恪守成規無容擅廢伏祈仰縣給帖勒石永垂等
 詞奉批仰吳縣給帖勒石永垂報等因奉此合亟
 遵行爲此帖仰本山監寺僧濟上等查炤帖文內
 備載寺基并新拓地址置立沿山田畝開闢池沼
 等項備敘前繇勒碑本寺遵炤守護焚修綿延香
 火如有不肖僧徒不守成規或擅棄賣者并有勢
 豪侵占者許即指名呈縣僧即迸逐占即追還執
 帖遵守施行須至帖者

右帖給鄧尉聖恩禪寺濟上等准此

崇禎十一年十二月十三日給

帖

鄧尉聖恩寺志卷之七終

鄧尉聖恩寺志卷之八

寺記

聖恩禪菴開山記

承德郎刑部主事永嘉陳亢宗撰并書篆

中吳號稱名藩非特以物產富雄天下而佛宇之盛咸
殫極壯麗雖小鄉僻壤無處無之郡西連山數十鬱然
森聳香臺寶坊爭據殊勝若靈巖之軒豁白雲之深秀
天池之幽邃固已爲古今名人所稱賞其巍然興于我
朝者則聖恩禪菴亦其一焉菴蓋禪師萬峰蔚公所翔

在郡西七十里袁墓村之鄧尉山按郡志以袁爲玄蔚
爲尉而名村以山公恒得石刻山下迺宋進士廸功葉
君和甫墓中物紹興二十九年所藏繇是始克正三字
之誤碑晚出菴時未甚有名故志不暇悉疑三字或姓
則莫知其然也厥地瀕太湖草木青潤羣巒環抱菴當
其腹軒豁而不病於敞深秀而不患於僻幽邃而弗失
之隘重樓複閣位置適宜並山勢爲起伏層現疊出如
畫法華山自東逶迤而南轉折西指墮半湖中宛若飛
舞下有小阜隆然離立類覆鉢正當其前而洞庭諸峰

點綴間處其次而湖南茗雪羣山復次其後云遠黛浮
嵐風飄沙鳥日夕容與三萬六千頃之波瀾七十二峰
之奇秀一盱衡若指諸掌誠足以兼衆美而有之也初
公以元末壬申提其師千岩之學自浙東遊歷至是觀
厥殊勝丐廸功之玄孫華一得棄隙數尺縛茆居之久
之人漸信向皇明開天表章眞乘而公道價益隆緇
素奔湊洪武九年始闢地爲觀音寶閣諸室號曰聖恩
焉尋與其徒普壽等構演法之堂落成而公示寂壽與
其弟普隱用甲乙之傳繼主菴事迺乘其願力發其留

資於經畫指授處建大佛殿以及伽藍祖師二祠及三塔院齋厨有堂春磴有室凡像設之莊嚴妙麗則僧普現善明與今住持智璿任之已而首座普持以爲梵宇之制必備鼓鐘警昏旦以集衆而闕焉非所以稱嚴肅乃爲重屋範銅爲鉅鐘而法鼓雲版則委之僧淨心自是雷轟鯨號六時震撼香花燈供淨潔明鮮而規制漸備矣永樂七年智璿旣正席尤孜孜於述作首撤大殿甍斃之毀敗者而一新之議以爲前所造法堂去殿一隅非處乃改卜於殿後龕置檣李蔡景和所施大藏經

於中易舊爲丈室中奉大士小像前設無盡燈後營僧堂右立碧炤軒爲娛賓之署而山門廊廡衆寮庫庖船舫之類以十四年之冬咸用告成于是丹甍紺宇文栱華棖山湧翬飛人天瞻駭而山川改觀四方遊覽之跡莫不以寓目爲勝事雲水之徒從而棲止者常以百數計有萬里而至者咸謂之勝槩宏模雖宿號名剎者未易過之其爲役至殷爲費至鉅雖出于四方善信之所樂施而人未始非之大殿則郡人金榮甫及其子婦三人罄家以濟而功居其半僧堂則智璿佐以衣盂之羨

爲鈔六千緡前後置山園二百餘畝斂其產貿遷以佚
歲用不足者則賴遠近好事之家舟肩之助庸取給焉
始公鑿四大井人莫測其意及是人無遠汲之困益可
見慧力之至矣智璿念自朔始已來三百甲子登載顧
未有作爰礮石以記來請余辭弗獲竊以爲天時人事
之會合一皆有數今而四方名勝爲方外據而有搜決
殆盡矧吳佛祠之盛歟是地也距郡不一牛鳴初無崇
岡峻嶺長林大澤爲之限隔方袍羽人之蹤日相尋乎
是而有目弗見焉豈非天造地設鬼神訶衛有俟于今

日者乎方公之得石刻也欣然若有夙契則其兆固非
偶然矣抑嘗觀夫所謂名山勝刹者皆興自往昔多者
千餘年次以五六百祀而後剏建始備公以赤手入吳
得容膝之棄於灌莽蒙羃中非若名山勝刹素爲人所
欽仰之爲易舉其難豈直什百乃能跨而軼之隱然成
一大叢林雖繇時事之會合而公願力之感召于人者
良不可誣其爲開山第一代祖師又何負哉普壽等又
能篤于繼志述事益可見其源流之懿非能深達事理
之不二示現有爲以成始成終者疇能然乎方今 聖

人執金輪以馭世佛日再中行見 敕額之頒有不期
然而然者矣余不足以知佛學之奧庸備著其山川之
美剏始之詳欲使繼之者無忘所自而顧名思義共報
夫 君師之恩因不覺其辭之覩縷若夫公之行業自
有語錄及見翰林侍讀學士王公達善所爲塔銘洎余
所造傳中茲不復贅

者舊本義志傑淨心福祥本忠砧基道人本安
永樂十二年三月朔旦住山比丘智璿立石

天壽聖恩禪寺事蹟記

通議大夫禮部侍郎王一寧撰
太常卿兼經筵侍書程南雲篆
承德郎刑部主事東淮史敏書

姑蘇去郡治西南僅七十里有山名曰鄧尉綴毓峰巒
之蒼翠遠枕洞庭之巨區前朝剏建天壽禪寺聖恩禪
菴爲上下道場元季寺燬菴存而後神僧萬峰蔚禪師
出謂是菴氣脈夙異乃於此開山說法十方禪衲爭馳
叅禮於座下者星拱雲合師日勤于封植培藝墾田於
川鑿井於谷佳木修篁葱蘢環繞山麓間師叱石預知

覺慧神通不可具述繇是居民向化施財資助者甚衆
殿宇廊廡輪奐一新像設嚴整安禪有室延僧有寮伊
蒲有供爲接衆叢林淨境師入大寂定其弟子勝學無
念禪師勘明上乘微妙正宗究竟不立文字之學道風
馳振於半天下幸際 太祖高皇帝龍飛開天得以安
隱洪武中雲遊行化於湘南以通靈侯薦 召至 奉
天賜坐喻問當世之事及正法宗旨師仰瞻具清淨眼
應對掉廣長舌敬謹一言無失 上大悅欲授以僧錄
總司綱領法門之職師載拜九頓辭不就 詔許之爰

灑 宸翰遣中貴官齋送還山厥後屢荷 龍章寵渥
錫賚彌厚誠千載一遇也師脫幻出塵其法弟智璿亦
蔚師手度梵行卓爾而能靜定心王超然物外恢宏其
新規增飾其舊製建層樓甃複道蓋其功深矣永樂中
秋官主事陳公亢宗嘗爲作傳以僧臘之高謝事復隱
同袍寶藏持禪師典其事寶藏旣超化僧錄講經實公
大和尚敘其本末撰靈骨塔銘其所傳有自也璿師證
無聲三昧其法嗣碧潭清禪師悟堅密徹見之微歷正
信希有之功其操也如金斯剛其行也如玉斯潔瞻是

菴嗣葺若是之金碧交煥歎寺之廢弛爲荆棘瓦礫之
場喟然曰夫三界一體十方一刹可不以彼此併而歸
之奚用謀于二業遂遣法弟道立上春官大宗伯疏其
事援 聖朝定制得允所請部檄下郡併額爲天壽聖
恩禪寺實正統八年也時住持虛席適巡撫工部侍郎
廬陵周公忱舉碧潭師以蒞其任師尤能砥礪加勉增
建毘盧寶閣天王殿香花石橋山林出色泉石重輝法
鐘法鼓祝 聖壽與天地同其久慧香慧燈贊佛法與
滄海同其長復構軒室百楹將廣階墀發坡嶺得奇石

玲瓏小山一壁四仞靈秀乃天成也豈非碧禪師道德
之所符夙緣之所合主其寺寺致日益盛大繼之于其
前續之于其後無忝祖風名卿儒碩樂與碧潭師交稅
駕于此則心曠神怡不知世之埃壒爲何如哉一日師
致書請予言記其傳宗事蹟勒石以詔後之嗣法者義
莫能斲予惟汎國之教流于東土延衍于天下後世臨
濟其一焉得其人則顯其地得其地則表其人今碧潭
師得時行道于太平之世寺與名兩立後之仰于清師
若清師之仰于蔚師也閶闔門船玄關以便雲水行脚

野衲休息之所可謂博施矣投寺之選佛場者常滿千
指香積齋糧歲以千斛計住持舉以甲乙規範有定而
不紊也因其請述此以復樂道人善之萬一云是爲記
大明正統十二年十月上澣穀旦住持沙門道清立石
敕賜聖恩禪寺中興記

賜同進士出身都察院右副都御史奉 敕提督雁門
等關巡撫山西等處地方崑山蔡懋德撰文
賜進士出身都察院協理院事左副都御史武進張瑋
篆額

賜同進士出身行人司右司副前吏科給事中嘉魚熊
開元書丹

聖恩禪寺在吳故稱名利剏建緣始王少宗伯一寧陳
比部亢宗兩記言之詳矣唯天順 賜額以後寺漸頹
廢淪爲酒肉之場其所謂萬峰禪院居大殿右卽虛碧
璿公之退居歲久規約盡隳遂分東西兩房嘉隆間盡
買爲民產至萬曆時徐忝廉泐得之讀書其中已知爲
禪院故業欲返無其主後聞郡紳將延吾師三峰和尚
主席病革時遺命歸寺師旣開堂唱臨濟正宗續十一

代燈焰而璿公塔碑出焉與清師塔相屬院後舊有璿公方丈其業主亦書券還基鏡心覺公先修塔院前建文殊堂適萬峰十代嗣法孫天童悟師入山掃塔見塔前有堂障湖山之勝移堂於左於是兩院並峙吾師更念僧徒食指難繼謀諸檀越市濱湖葑田三頃有奇開荒鑿沼以資灌溉仰輸國賦俯飼僧伽建純白窩大義堂放生所爲聖恩子院殿左鐘樓向懸萬石巨鐘嘉靖間被權相攫去至神廟中年曇旭曉公受紫栢大師命募銅蜀山值前吳令傅公光宅持節按蜀力爲勸

揚獲銅萬餘筋入冶三鑄不就曉願捨身洪鑪始成器仍鏤法華經六萬字於上雲棲僧智在巢露架晝夜杵擊千聲聲持大悲咒一遍天啓丁卯六月其鐘丙夜隨聲放光如飛隼迴翔祖塔曉公歿鐘樓猶未構也大殿佛閣並爲震風凌雨飄搖柱棟莫支其徒體慈洎本山如修將殿閣鐘樓及坐山悉交吾師師復償以百金躬荷其事俾麓屏貢公任鐘樓之役而師自捐鉢資繕佛閣已經畫內外指授規爲付法剖石壁公退息死關匪久示寂壁公嗣統克振宗風亟新大雄殿併翔天王殿

山門大悲堂方丈禪室復購栴檀雕毘盧像請大藏供奉佛閣昔閣後璿師亦建禪堂有天開圖畫一區程太常南雲題額東爲雙梧軒少師姚恭靖所憇也西曰碧炤軒軒後曰萬峰深處以迨曠壤之粥爲幽宮者以堪輿不利告遷乞贖而寺之址斯全復無遺萬峰之業實于吾師中興云嗟乎非吾師何以天人相轉如是其初爲勸相者吳令陳公文瑞吳江令熊公開元鄉紳閣學文公震孟宮詹姚公希孟忠介周公順昌也其山磽頃畝永免徭差坐派軍恤以護持不替者巡撫莊公祖誨

張公國維巡按陳公乾陽祁公彪佳縣令楊公雲鶴牛公若麟也稱揚大法若財施殷殷無怠者宗伯董公其昌勲卿葉公紹顒侍御李公模孳廉吳君瑞鳳碩士周君祇徐君泰寧周君永年沈君愈昌也不類德雖立雪門墻淺衷弱植無能裨益大道祇吾師西歸之頃德嘗啓手啓足辱提耳命曰寺成日爾其作記德稽首敬諾迺名根未淨驅馳王事非踐戎馬之郊卽入荒殘之地鞅掌未遑茲銜命晉疆寤寐之際嘗若見師而璧公札至遂盥手紀其大略若夫師之道行海內共尊德

小子何能贊一辭其記亦紀夫有爲之蹟倘云大道則不立文字記亦贅矣奚以多爲

大明崇禎十四年辛巳季春朔旦住持沙門弘璧立石

華嚴壇碑記

蓋聞寶輪香海悉在一華交攝之中行樹音聲卽是衆生發願所現故毘盧無相不離毛孔而顯光明普賢有權能挈塵界而遊清淨初從信入象王迥絕狐蹤終用智收獅子頓消驢乳鄧山聖恩寺堂頭大和尚剖石禪師者披釋迦如來祖衣受天山老人正印幼涉文字域

輒於斯經有酥酪因緣長叅生死關仍仗是諦詣遮那境界潜孚密證八十卷剝肉藏珠揀異標同六十年通身透頂顧猶以一切懺儀十方稟式若大悲楞嚴等部咸築壇以莊嚴惟大方廣佛勝因獨瞻容而杳邈遡厥先代大有祥徵繪像建華堂瑞鳥翩翮而戾止土龕修合論猛虎躡躅以皈依和尚援古驗今乃罄一生闡揚之盛心補本山缺陷之曠典於是方丈後墀院左巍巍華嚴壇出焉手芟荆棘廣購榱桷棟宇雲浮則高連碧落軒墀日麗則俯瞰平蕪中供華嚴聖相三尊旁貯大

經五十三部妙選僧伽精嚴禮誦烟光滄渟幡影參差
聚莖節於一絲滙海山於半粟以一世界現一蓮華合
小千世界爲一蓮華又合大千世界爲一大蓮華此日
月須彌各各不相涉之法位也觀其圖者可以徵娑婆
之湫隘與幻住之無窮自初會菩提場二會普光殿三
會忉利天以至八九復會普光殿逝多林此信住行向
地以至等妙各不相紊之次序也領其旨者可以徵開
示之不難悟入行布之不異圓融且夫啓窓南眺則太
湖浩淼峙兩洞庭爲左右臂之雙垂鍵室靜披則梵筵
煒煌儼三大士卽法報身之互用梅花極目逝多林炫
炫檻前童子南詢妙峰山青青杖底師之悟超象罔故
文殊失其慧機師之行滿僧祇故峩喟讓其毅力師不
起於座而徧歷閻浮故勝峰香積以下步步追隨住一
山卽具衆山之巖壑師不染於趣而圓彰法界故勝熱
無厭之儔時時遮攝示逆行益表順行之威儀宗風播
矣教乘超矣爾時塵拂所加智過鶖子爐烟旣集緣等
空生彌勒之樓閣門開觀音之耳目障撤不肖鈍根覩
而喜之矧承慈命感且倍矣自悔一生鑽故紙悶於牖

蠅而私竊微明於經下兼愧十載滯俗屢同夫穿鹿而重依大乘于壇間若使役色身作僕已逼栽松道者之齡僅令瀝心血充供敢備衆藝童子之數塗毒鼓聞聲心死前莊嚴後星宿不離彈指而脫落言詮頗黎鏡觀影出生左清涼合方山直取妙心而流通儀軌鐫石以垂金地聊酬善信之檀施鏤版而布叢林卽當文句之緣起謹記

天山座下兩世聽法弟子米前
賜進士出身河南開封知府武進薛家拜手撰

藏經閣碑記

吾吳天壽聖恩禪寺繇山門拾級而登仰見傑閣聳於
虛空剖石壁和尚所構以奉一大藏教者也其地踞鄧
尉之半層巖拔起支隴蜿蜒雕楹文礎插入崖腹前瞰
具區渟泓萬狀遠則洞庭兩山近則法華漁洋諸勝若
拱而揖或環而抱其下則秀樾干雲修篁漏日法花忍
草茁長繽紛怖鴿馴禽飛翔匝繞信兜率之鉅觀般若
之勝境矣先是萬峰蔚祖當
皇覺現身之初受聖恩開山之寄弟子智璿等傳衣主

席琅函貝葉結集流通尊奉之地卽今毘盧遮那閣是
已歲月既往龍象中衰千箱秘帙化作飛塵萬衆名區
鞠爲灌莽於是三峰漢老人杖錫飛來剪剔蕨荒經營
宏敞庶事草創未盡云爲剖師親承記蒞進補其處時
節因緣緇素瞻仰信施填委無廢不興梵筴竺墳缺焉
未備會有峨眉道者裝成南藏道梗西川因其方便之
功申我殷勤之請遂移法寶作鎮山門方當牛首颺廻
瓦官霧塞未踰旬朔便接烽烟獨此經早畀精藍不罹
劫火咸以爲修多羅藏有天龍神鬼百萬護持和尚福

德感孚不脛而至四衆頂禮罔不欣欣顧其時閣猶未
之建也蓋毘盧閣雖經修葺業以供養諸佛安集僧徒
將謀改卜高原另圖巖奉吾母朱太夫人專心在道入
山稟戒躬覩勝因發願弘施聞者全集監院濟上等迺
相材運甃練日鳩工經始于癸巳之仲冬告竣于甲午
之季臘列楹三間廣筵九丈深如其廣之數崇網其深
之一翼翼巖巖若化若涌就中埭釋迦藥師彌陀三像
慈容睟盎纓絡交加其旁則方甌長龕東西森向瓊籤
玉軸克仞琳琅經律論藏部分櫛比共有六百七十餘

函和尚以丁酉之夏六十初度諸山老宿爲諷華嚴秘
典者五十三人皆安禪閣下規重矩疊衣裊肅朕清淨
道場得未曾有和尚曰是閣之成所以揚祖風示學者
不可無記迺以相屬偉業合掌而白師言我佛如來演
說三乘十二分教利益衆生達磨以拈花微笑之旨不
立文字而見性成佛蓋利世人教相紛拏欲以掃除支
蔓非謂鹿野苑跋提河金口所宣一切空之也古德相
承共弘斯義後來門庭各立諍論滋多或執教以議禪
或竊禪而掃教識者憂焉今和尚從拈椎豎拂之中搜
揚真典孳孳不倦於以撈籠今古震壓諸方豈不盛哉
且成壞相仍世相如是以萬峰之

聖皇授記說法名山猶不免法席榛蕪勞後人之修復
朕則貞珉之有鑿也其可已乎是經也出於干戈俶擾
之際懂而獲存百世而下知其孔艱是續是述俾勿隕
墜皆記事之辭所不得而缺略者也爲之頌曰

世尊天人師

普說無上道

傳譯至震旦

是名修多羅

毘尼阿毘曇

不可得思議

鄧尉古道場

衆山盡環繞

有一善知識

親遇金輪王 手持玉庫經 開演一大藏

百年化宮壞 乘願迺再來 吼若獅子威

直標正法眼 臨濟大宗旨 文字本不留

方便利衆生 何所不融攝 但能去纏縛

不落義解門 卽此文句身 足證圓滿智

如來廣長舌 八萬四千言 於一卷卷中

各滴醍醐味 於一字字內 各貯摩尼珠

護法天龍神 呵衛在左右 以此刀兵難

末劫不得侵 將我貝多羅 移入清涼界

寶閣蠹天起 廣望千由旬 洞庭七十峰

卽爲耆閣崛 震澤五百里 卽爲阿耨池

無量妙高臺 變現彈指頃 當知向上著

不礙於有爲 觀像生敬心 藉彼莊嚴力

諸佛所說法 億萬恒河沙 究竟歸虛空

本來無一字 見道不見山 何處復有閣

見心不見佛 何處復有經 乃至法界中

草木禽鳥等 飛鳴與開落 若以慧眼觀

無非是經者 經如紅日輪 旋繞須彌山

照一四天下 經如香水海 舟航到彼岸

涌出青蓮華 頭目與髓腦 有人乞施捨

無怖亦無愛 此經當護持 能續慧命故

珊瑚與瑪瑙 高過蘇迷巔 瓦礫了不異

此經當寶惜 能種福田故 用此告來者

常生難遇想 薰心與注耳 歷劫乃不磨

我今作此辭 毫端見如來 刻之靈鷲峰

永永示無極

順治十四年丁酉三月婁東奉佛弟子梅村吳偉業薰

沐拜撰

住洪州雲居晦山法侄戒顯和南書并篆額

康熙二年歲次癸卯冬日監寺濟上立石

永熙
手
卦
水



